

國
朝
文
匯

國朝文匯乙集目錄

卷二十八

彭元瑞

號益松江西南昌人乾隆丁丑進士官至樞
辦大學士工部尚書文勤有恩餘堂編稿

尚史序

送袁雅堂卓異回任序

戶部郎中劉君墓誌銘

湖北施南府通判姜公墓誌銘

蔣士銓

字心餘號鐵園又號清容江西鉛山人
乾隆丁丑進士官編修有忠雅堂集

何鶴年遺集序

劉氏重建五忠祠碑

贈兵部左侍郎墨潭周公傳

入祀昭忠祠鑑南吳公傳

杭州府餘杭縣知縣蘇公傳

明湖南總兵彝山周公墓誌銘

廣州府同知屏文魏公墓誌銘

一

一

二

三

四

五

七

八

八

八

十

贈文林郎孝子吟臺蕭公墓誌銘

十

張

洲字道奉號南林陝西武功人乾隆丁丑進士官浙江德清縣知縣有對雪亭集

王猛論

十二

王朴論

十二

屈蠖軒記

十三

江舟出峽記

十三

探靈巖記

十四

石砭城南石砦記

十五

吳紹曾

字皮位號魯也浙江秀水人諸生

烈婦鄭氏傳

十六

袁貞女傳

十六

程大中

字奉時湖北應城人乾隆丁丑進士官穀稅有在山堂集

宋太祖論

十八

洞庭濯足圖說

十八

築村詩鈔序

十九

陸薇飲詩集序

十九

迺逸堂詩稿序

二十

陳

字汝師號拙修浙江平湖人貢生著有拙修文稿

論名上

二十一

論名中

二十二

論名下

二十三

龍湫山人像贊并序

二十四

薛著廷

字思號補園陝西洛南人乾隆丁丑進士官編修

邈雲三編序

二十五

南林張君墓誌銘

二十六

國朝文匯

卷二十八

目錄

二

國朝文匯注

國朝文匯乙集卷二十八

尚史序

彭元瑞

立乎今日以成尚古之史其將能乎曰美其不能也羣經皆古聖人之事諸子百家去古未遠各有譏述取而薈之以成一家之作而非一家之文也今有商彝周敦父癸之尊史克之鼎崎嶇之碑石鼓之字一器一文之流傳好事者不惜扶異剔隱集以為錄而謂其大者而懸置之可乎太史公作史記所採古書今什不存五且烏知夫後此數千年其佚不更倍於今之距漢乎憚其所不能而議其所能無惑乎古之日湮也然則羣經尚矣諸子百家其可盡信乎今有垂髻弱冠者聞齒齧戴白之叟語我生以前事又或出塞航海萬里來歸與不出閩卷之人談其身所涉歷聞見雖其言不無誇誕然理之可信者信之否亦以資博洽俟考証云爾孔子作春秋所見異辭所聞異辭所傳聞異辭疑者闕之未聞不錄也矧大書分法作者之意具在矣若是則是書之作於古人何若司馬紀五帝小司馬補三皇皆大概也皇王大紀綱目前編紀世而已古史意存乎正龍門而非其自作路史博矣或不馴且不統乎史近代釋史則紀事之體今是書也紀表志傳一從史例釐然秩然以其意為論贊悉執於正令讀者貫穿三古其文可誦其義可法而其大者於古帝王所以治國平天

下之道。若天文律呂之奧。疆理井田之大。兵刑之繁。氏族之細。咸具諸志。張皇揚厲。損益升降。觀者如揖讓。皇古之世。而慨然知二帝三王之可復。此則尚史之所獨也。

送袁雅堂卓異回任序

予友之令於蜀者。得循吏二人焉。曰袁雅堂。曰朱秋漪。予家距雅堂所居二十里。而近雅堂距秋漪二十里。而遙居相近也。予長於雅堂兩歲。雅堂長秋漪三歲。年相近也。予與秋漪同補博士弟子。與雅堂同舉於鄉。又同成進士。出處相近也。洎兩君綰綬。坤維予屢東尺。南服不相見者。動輒十年。二十年離合之感。往來於懷。前年秋漪以卓異來。今年雅堂又以卓異來。紅塵白雪。鑪寒鐙熄。斗室坐而縱談者。各月有餘。而三人者。鬚髮俱白矣。雅堂為人。開朗而中醇。秋漪簡默而內敏。其好修守。介有所不為。則一。此其於今之所謂能吏者。宜皆不中具科。而連三年以最報。可以慶兩君所遇之凝。而蜀之大吏。能察其下。其取人得所好之正也。予問雅堂。今中外皆言蜀州縣無虧空信乎。曰有。打箭鑪之商稅。歲不及額者二千兩有奇。各州縣公蠲而償之。嗟乎。此於他處百之一耳。而尚何言。雅堂語予。蜀之山水。灌口引江。以為渠口之所入。醜之鬻之。達於二十七州縣。決決汨汨。與塗俱轉。如畫中樹。一幹所拆。千條萬柯。漸遠漸支。數不可紀。其山多泉。疊壑累騰。坡陀上下。彌月不雨。決則放水。三世之農。

家無龍骨。自比歲豐。益四醕之餘。泛江下輸。露積陳因。腐不可塞。民豐而樂。故下吏得藉手以有成也。予曰。此誠長者之言乎。方今

聖天子勤恤民隱。為閭閻饜飢計者。截漕利運。平糶廣賑。至纖且悉矣。蜀得順天時。因地利。吏治之善。和氣薰蒸。以有此也。雖然。此天下之利也。古人有言。粟生金死。誠哉。江之為水。仁柔而宜稻。其力可以無不及。講積儲之地。求轉輸之塗。通其惠以均之。博其力以勸之。俾蜀之士。不至穀賤而傷農。而天下之虞艱食者。有所恃以無恐。其亦有道乎。今之為官。僅及乎一縣。且暮而思之。陳之上官。本之於蜀。而溥之於天下。必有留意乎此者。於雅堂之行。書此以贈之。且以誌秋濤。

戶部郎中劉君墓誌銘

公諱世寬。字匡宇。號幹齋。新淦人。曾祖鎮隆。祖鼎。邑庠生。父學瀾。康熙癸巳。恩科舉人。山東高密縣知縣。兩世以公貴。贈如其官。公以諸生中乾隆甲子科舉人。乙丑成進士。初任浙江淳安縣知縣。調繁黃巖縣。海疆期滿。內擢工部營繕司主事。丁母憂。服闋。補虞衡司主事。晉都水司員外郎。郎中。監督寶源局。管街道廳。授山西道監察御史。巡西城會。

上加意民事。思得練習材。敕部取京職中由知縣者十四人引。見以公為廣東

惠潮嘉兵備道旋以父老終養歸。既卒事再補惠潮嘉道大吏以不勝任告以同知用自請改京員授吏部文選司主事。嘗稽勳司員外郎。戶部山西司郎中。與乾隆五十年干叟宴五十五年。公年七十一。乃告歸。歸十年。以嘉慶五年九月二十日卒。明年某月某日葬於某山子七人。佳珩。邑庠生。佳琦。四川達州知州。加知府銜。佳瑤。佳琛。俱太學生。佳珙。佳珮。佳珍。邑庠生。女四人。孫男七人。女四人。曾孫男三人。女三人。公令淳安。縣民潘景霞妻姜氏方姓。以適妒出為錢。正公妻。七月而生子九。高付徐乾亨。妻乳之。四歲。正公無子以為繼。而遇之虐。九高漸長。姜氏以告。遂竄依景霞。正公控以誘逃。且謂所繼乃乾亨子。姜氏袒後夫詞。翻異。官莫能理。公履任集鄉民於城隍廟。禱而瀝血。先之以乾亨。九高不凝。繼以景霞。姜氏九高則凝。事乃白。及令黃巖。有王世璣者。聘其姑之女符氏。其母與姑聞。亟悔婚。姑之夫賜履諸生也。鳴之學使者。以女終身不嫁。立狀而罷。既而私以字趙氏。世璣鳴之。公引符氏置對。藏雖自刺。公私度曰。終身不嫁。非人情。然女實屬王氏矣。自刺為父解也。令還歸。而陰命與之王氏女。固王出也。賜履以世璣奪女走告。公笑曰。徐之逾年符氏生子。而世璣亦為諸生。公屢任善政。甚夥。此二事兩縣到今傳之。高密公之舉於鄉也。與先光祿公同年。公與先仲兄同為浙江知縣。又與予同仕於朝。幾二十年。其歸也。詩以送之。有

曰。兩世知交。分袂遠州。年仕官典衣歸。嗚呼。可以知公矣。佳琦來請銘。不獲辭。銘曰。氓之蚩蚩。情如琴瑟。疇為之父母。而一不知。我得其情。彼不得盡其辭。胡神於治縣。而詘於監司。抑大吏實尸之。撮事瘞詞。以為史師。

湖北施南府通判姜公墓誌銘

明有直諫之臣。曰萊陽姜先生某。以言事指權貴。觸怒瀕死。國亡前一月。始謫戍宣州。滯寓吳門以卒。終葬戍所。子孫或為宣城人。或為吳人。先生生實節。實節生本仔。本仔生贈榮祿公。公諱某。字念劬。號野鶴。少受業何義門之門。補金山衛學生員。歸籍萊陽。食餼援貢太學。與修大清一統志。成議。統得廣西太平府思州同知。在任十年。猛人愛之。攝思陵上思二州知州事。治業贍精勤。上思某甲出賈歸。為人戕於水。莫知殺者誰也。久不決。公下車。廉無賴乙。是年自他挾千金歸。好語致之。一見曰。此殺人賊。目動色變。遂吐實。尋昏遶山西朔平府通判。分治甯遠鎮。如劇縣事。立辦旋以裁缺。再任施南。治江防有功。年及格。致仕歸。公女弟適申氏。隨夫任雲南。卒公萬里歸。其喪萊陽。先生遺產在故里。公歸。族人返其田。公推為祭產。蓋其細行猶急名義。輕財如此。公生於某年月日。卒於某年月日。壽八十有二。贈如子官。所著有紅鷺館詩鈔。六松軒制藝若干卷。配贈一品夫人畢氏。浙江錢塘縣某人女。生富族。

益具甚豐。及外家落，乃悉返之。故能佐公為廉吏。以某年月日卒於思州官舍。距生某年月日，壽六十有一。時子晟方困諸生，洎公卒，晟官刑部郎中。浸通顯，越十有五年，晟為刑部左侍郎，始陳情乞假歸葬，荷。

上恩允光榮誠信，備禮有加。以某年月日，奉公及夫人合葬於某山。首某趾某子三人，長世昌先卒。次即晟次某，孫六人，瑞與晟同官二十年。讀明史，知公先世事，屢持吳門使節，裝裛二姜先生祠下，故為之銘曰：

方先生以直言繫獄，夜半禁中出片紙，幾死桂棹。父闔門殉難，乞歸葬不得，何其酷也。公雖未大顯，隨地能自表暴。及侍郎乃以治刑為聖世御敵，保世滋大。蓋公慶之篤也。易曰：天地閉，賢人隱。詩曰：王國克生，惟周之禎。夫豈惟一家抑時各有所屬也。

帝鑒烏私，允臣牖。若堂者，阡後致福。我作銘詞，無溢恧。

何鶴年遺集序

蔣士銓

乾隆乙亥予以假閒居南昌于破寺壁間得鶴年詩讀之驚喜欲絕跡而訪之君方授徒佑清寺伏一長几亂書繞其身纖瘦濃眉目光睽睽如電兩顧崢嶸儉下露齒肩聳如山白眼上視吟哦自得冷峻之氣颯颯然客自來去無周旋人不欲知鶴年鶴年亦不欲人知寂然讀書與古人為徒予見而異之噫此之謂能自立其身與名者也君既與予定交乃傾筐出其詩屬予相甲乙三日卒其業題五百字還之予蓋幸子載死後又得一鶴年張吾軍君亦若唯予足以知其詩者凡予所交遊能詩者爭欲識君而君亦欣然把臂不復相拒予覺鶴年向之冷峻者而其和可飲焉丙子君舉于鄉予亦假滿入京師甫與饒霽南太史相見拍予肩曰吾邑同學一奇才埋頭鄉山二十年無一人知己今年纔偕計車來予訊為誰對曰何鶴年也予啞然笑之告以故噫不汲汲求人知而得一知己之手不汲汲求世知而未嘗不見知于主亦能自立其身與名者豈遂終窮也哉丁丑君下第翩然去庚辰再下第君貧不能去詣予謀予介天津二友曰關君曰王君延之為子弟師君怏怏去歷數月手書稱主人覽再歷數月稱樂而安焉天津之詩已成帙復寄予甲乙予益歎君汲古之深而聞道之早也第憂生之嗟嫉俗之感隱然若不得已者竊歎君方盛年何鐵石心

賜遽至於此耶。然而可以起衰式靡矣。既而聞君病。市月。聞君死矣。主人具棺殮冠。胸皆如禮備。僕從送君柩登舟。平安還。坐予北望。招魂南瞻。感涕既痛。君高才短折。復念君母年六十餘。繼妻五月而寡。無兄弟。無子。無田產。僅有先人老屋一椽。負城陰。嗚呼。逝者已矣。其生者若之何而可也。不亦痛哉。乙酉。予再假返里。登君室。哭聲嗚嗚。滿帷中。君母不能成語。淚漉漉被面。予腸轉如車輪。嗚呼。若之何而可也。漢溪黃雨椽進士與君友。篤侍君疾。扶君柩。收君遺稿。梓君詩若干首。金谿何渭綸解元與君為宗兄弟。左右君母。具存問。代營殮葬。為君婦謀醫藥之資。且將重梓君全詩。屬予序。嗟乎。如雨椽。渭綸兩君。可為鶴年死友。而有古君子之風。裁者矣。鶴年詩。鞭辟刻削。不襲古人一字。凡世俗詩人肺腑中物。無錙銖犯其筆端。廉悍偽傑。生而獨聞。雜之唐宋人集中。雖智者莫辨。非作者亦不知君詩之迥異乎時人所為也。西江詩。廢墜日久。既生一楊子。載又生一何鶴年。而先後死亡。子載有三子。皆馴謹。能讀書。鶴年竟無嗣。嗚呼。豈才之大者。受罰益深。而容容者乃得久存于世。兼可邀人間祿與位。以誇耀鄉里市井乎。鶴年無所恃。其近者一渭綸。遠者一信宜。令恬溪而已。渭綸為宗人。且如此。若恬溪為君從兄弟。又豈能辭其獨任之責也耶。嗟乎。予倖竊一官。今且奉老母。攜妻子。縶泊天涯。并一椽而無之。所謂既痛逝者。行自傷也。鶴年

其有知予無知予讀君詩者亦可愴然而悲矣

劉氏重建五忠祠碑

劉忠顯公諱幹字仲偃崇安人元祐舉進士為北宋末名臣殉難金地宋史載忠義列傳中稽公平生禦災捍患法施于民以勞定國以死勤事祭法所垂百世不泯而
知越州時惠政兵威尤著越民為公立生祠于圓通僧舍乾道丁丑史浩為州守徙
公像于杏花寺左榜曰劉公祠逮元大德間公之十五世孫文賢官山陰幕僚葺舊
祠以忠顯公頌忠定公子羽忠烈公純忠肅公珙配享稱五忠祠明天啟間公之二
十五世孫左都御史宗周復為修治 國朝乾隆元年六月初九日海風震盪垣宇
摧塌自是春秋有司來祭惟就瓦礫荒基望空釋奠不亦褻乎閱庚寅公裔文壇廷
棟等慨然曰祀典祠廟與城社並重官司絀于支銷歷久不治為後昆者烏能忍乃
謀聯義會先集合族支長正誼等十房子孫益以文壇純淑等共十八人各出貲若
千得三百六十金推文壇純淑董其事辛卯正月之望始建寢室享堂各三楹兩廡
各三楹外門重門及繚垣告成在七月十有八日是役也溽暑風日中文壇督率力
尤瘁計用錢四百六十九貫除收若干貫其闕者文壇補之而工以竣明日子姓具
牲醴奉主于龕以肅始祀五忠之靈復有憑依於戲權矣初越民歲輸銀湖田租二

萬石積漸至十四萬石。擢隸中官。充應奉之用。法嚴額重。通亡者輒勒鄰比償之。公到任首疏除其害。方臘反。陷杭睦二郡。越官吏咸逃。公葺堂練軍。出奇兵擊賊。屍蔽路。萬戶以安。公功之在越者如此。餘載史傳不具論。嗟乎。古名宦豈不多乎。求如公之子孫。即遷居所治而大其族者罕矣。族大而醫纓甲第。至五百年。孝友弗衰。又能舉官司祠祀。廢壞者一新其制也。不更難哉。五忠拓其基。二孝闢其奧。總憲復以孤忠托其將傾之厦。而劉氏堂構門庭。遂堅固而不可拔。旁風上雨。但侵其有形之棟宇而已。夫何患焉。爰記其廢興于碑。而綴迎神送神之詞于左。

國有祀兮。草離離。家有祠兮。神依依。國廟毀兮。子孫成之。五忠來兮。閃靈旗。公納夏人兮。西事平。公殺睦寇兮。越人生。種軍潰兮。郭虜歸。我佳兵。請馬兮。公皆不可強。弩射兮。賊倒退。臣力竭矣。乃去位。貫與攸兮。豈知公。金人待用兮。公曰不忠。酌危酒兮。解衣條。千秋萬歲兮。享漢毛。右迎神

公靈格兮。祀事成。壽聖西岡兮。公面如生。四忠列侍兮。若家庭。式享式祀。伊始飲福受胙兮。之孫子。官來釋奠兮。靈齋止。越之父母兮。劉之祖宗。國之一柱兮。家之五忠。國廟再興兮。五忠之宮。神具祐兮。樂融融。右送神

贈兵部左侍郎墨澤周公傳

公諱儼字欽齋號又公別號墨潭。姓周氏系出楚之營道縣為涑溪先生十四世孫。其世次具載彝山公墓誌不復詳。彝山先生公考也。諱茹茶。明湖南路正總兵。妣吳夫人。生公及弟儒。公早慧端厚。年十三通經史。十五能文章。天啟間。彝山公以智勇立功。威名赫然遍天下。國變後。僭偽紛乘亂賊四起。又數從王春石師相。及忠國王公。恢復數十郡縣。既而觀時審變。遂解印綬去官。往侍二親于桐梓。親歿。返柩葬涪州。時康熙辛卯之歲也。戊申。公入庠。甲寅。滇逆偽帥遣聘使招致總戎。公怒罵之。儒恐激則致變。請往謝。至閩中。為賊所留。總戎公恚而疾。公于是出奇計。挈弟遁歸。總戎公霍然起曰。吾家清白不污矣。吳逆設制科。士被迫脅多往應。公匿跡深隱。乃奉父母避居黑塘山莊。又徙白碇。巖栖七載。研究青烏。珞球。軒岐。璞絡等書。入理尤邃。庚申九月。譚宏亂。賊眾百餘。夜薄公室。公挺戟刺其魁。遽引去。公與儒謀。方負父母走。力怯不任。彝山公曰。賊且復至。兒等速遁。勿同殉。公抱翁哭曰。今夕死耳。不能以親委賊。俄而賊果來。儒奮身出敵。賊砍之。跳乃斬扉入。攢刃刺公仆地。而儒率鄰眾挾兵反攻。賊為駭竄。明日。儒創裂。將死。公稍稍甦。命舁榻就弟枕側。與訣。儒號而絕。母夫人感慟成疾。旋亦卒。儒至乾隆間。得旌其孝。按史載孫思之亂。烏程潘綜扶父。驟出避。父老不能行。令綜走不可。賊來砍。綜抱父腹下。以頭面受四創死。而復蘇。

後有司奏改其村曰純孝里與此絕類第無兄弟同禍耳。儒歿後公撫恤孤寡備至。歷三十年如一日。且戒室人曰必善視之勿令嬌離含痛及姓項漸長乃分田及奴婢為立門戶而翼之如初。于是再徙賢人鄉建陸舫小菴詩花藥娛翁使諸郎誦讀其內。庚午應鄉試得舉名列第四。明年下第同年生任典謨卒旅歸。公為具棺殮護持還里而葬。山公病適劇公禱天祈減己算以代。又嘗糞為默驗翁病于是得遽痊。歷三年然後卒。公號慟七日絕食飲鬚髮盡白形骸枯瘠。其至性純粹蓋如此。公仁惠重然諾好施與有貧者輒焚其券或以妻子託歷久無負于友朋親喪雖千里必往會葬。有東漢君子風義又善方書活人無算。甲申奉部檄謁選入京八月病于舟次。惟一幼僕侍乃檢行篋所著宗譜及詩文俾遺諸子。遂歿時康熙四十二年八月初五日也。距生順治六年十月十七日。歷年五十有六。祔葬磨陀山莊總戎公墓次。聞公讀書山中時夜有奔公者力拒之且誓不言其姓氏。婦漸感去鄉有虎患公為文責神謂奸凶橫行神弗誅殛乃縱虎為虐有漸享祀越數日虎盡噬里中大猾而隱人咸異之。惟正乃格不信然也。公生四子五女子珣珽珪珽珪登乙科。令天門多治行。孫十人。某某由科目出宰者四人在庠序者五人。惟珽子燾由翰林起家。今官少司馬曾孫若干登賢書者興沅興洛。惟興岱亦官翰林侍郎公子也。

太史氏曰。語云。孝而仁者可與言忠。信而勇者可與守義。公百行完美。比德昔賢。若全親于難。則趙浴江革牛微也。脫弟于賊。則趙孝悅萌淳于恭也。滅算延魏。魏廁嘗冀。則王薦石建黔婁也。髮白形毀。則郭廷焯荀文師也。至如豺狼遠徙。猛獸避塗。則又吳遠司馬嵩也。而暗室弗欺。端潔自守。于曹鼎陸公。容有同軌焉。嗟乎。凡公所有者。他人得一已。傳于世。而公兼備焉。史稱濂溪先生清明誠一。寡欲于無。篤汎愛拯憂患。護友我。守親墓。泊然于世。公恆肖焉。嗚呼。是乃濂溪之裔也歟。

入祀昭忠祠鑑南吳公傳

吳璜字方向。號鑑南。浙江山陰人。曾祖諱濬哲。康熙壬子舉人。官內閣中書佐大司馬。留村公平。廈門軍功加二級。晉封賜一品。蔭祖諱振。由歲貢生。宰玉山。安肅兩縣。考諱煥。世稱樸庭先生。國子監生。有文不遇。為時推重。別有傳。生二子。公其長也。母商氏。為元江府知府諱盤之妹。公生具宿慧。能承家學。乾隆乙卯。舉京兆鄉試。庚辰成進士。除戶部雲南司主事。己丑。出知湖南澧州。至河南尉氏。父卒。于塗。貧不能歸。時知術輝府朱政。為公同榜進士。延公掌書院。服闋。獨扶父柩歸里。與母合窆于型塘先域。癸巳。再謁選。益空乏。三月。棟發四川。馳入術輝。仍寄孀于政。去至西安。貴斧鳩中丞畢公沅。贈金三十鎰。乃得行。四月十二日抵成都。金又竭。拮据得十鎰。買

鞍馬。五月十七日。詣登春軍營。山水惡劣。積雪不融。盛夏扶杖。猶有寒色。大將軍某。素失將士心。六月二日。賊圍登春。急初十之夕。木果木一軍潰。大將軍死。明日。總督冲圍得出。登春一軍亦瓦解。公偕妻叔周輔鈞。馳至崇德。山梁賊鎗中輔鈞。騎突逸。不能止。返顧公為礮石飛擊。人馬墜溪河中。同墜者四千餘人。時年四十七。事聞。得贈加道銜。入祀昭忠祠。子安祖。方十齡。得廢如公。杖同時死。兵禍為予友者。則有南昌彭同知元璋。大興孫知縣維龍。陽湖王主事日杏。松江趙主事文誌。維龍先一日死。日杏後一日。穆山塢中。賊飛石死。文誌被賊斷臂死。元璋挾三奴徒行。賊且大至。奮身躍江中。時年六十有一。公性嗜學。重友義。為舅氏商公愛。重能苦吟。篇成數改。竄求必傳。一字不安。至廢寢食。飲酒談文。終夕不倦。奴子苦饑。怨聲嗚嗚。如弗聞者。然議論馳騁。輒以人倫網紀為任。都下端人名士咸器之。所著有蘇門紀遊。及黃珠山房詩六卷。惟入蜀所作。棄亂軍中。可惜也。

論曰。予聞周生云。登春突圍時。鑑南苟疾馳。尚得脫。顧攬轡。夷檣。謂周生曰。偷生無補于事。死吾職。妻子君之責也。語未終。遂墜澤中。嗚呼。予在越州。與公交遊。且一載。或目為詩人。至此而公之論定矣。予蓋聞公平日所志者大也。然而報國僅止于此乎。予又怒焉。垂涕已。

杭州府餘杭縣知縣蘇公傳

秦中蘇氏以功業文章氣節顯于西漢唐宋載諸青史者不可指數其達於府谷之祖則自元末廷美公始數傳而後其以縣令長史儒官著聲者代相繼然俱不顯赫又世際太平故以義烈見稱者絕少其服一命之官已去厥位無守土之職必死之責而能臨禍難蹈白刃甘之如飴大節炳于天下後世者則餘杭公之義烈為最公諱萬元字澤我由萬歷年明經考授杭州府經歷以在官廉能擢知餘杭縣事懷宗朝予吉在籍道土賊高有才據邑城賊徒郝某率眾劫公使從公大罵之賊知公不可屈乃繫以素裳公笑曰吾廉吏耳未嘗作賊殃民安得賞即有亦安能媚賊耶賊怒大索堂室間掘地至三尺許無所獲乃交刺公仆于地瞳目曰賊技止此耳言畢氣絕域中方亂公子呈書年未冠經營數晝夜具柳棺為殮視公目不少瞑顏色凜凜然若將起立者遂葬于家門北國朝順治六年改葬縣西荷花塢北山之陽制撫提學皆奉綽楔旌其門事載省志公元孫遇龍壬申成進士既而得浙之龍泉令瀕行具公靖節狀乞為傳乃據實以書

論曰明末流賊縱橫秦蜀間食祿守土之臣棄城逃竄反面事賊充然無復廉恥之色者紛紜矣或謂公一家居縣令耳賊至可去不及去或可不死死或可不必烈嗚

呼勇矣哉士君子不幸生亂世無尺寸之柄以禦賊至攘奪我先疇塗毒我桑梓義憤所激有不與賊俱生耳何避為故當賊至不去時度公舍生取義之心若不死不妄者故罵賊烈而受禍甘使公當時有封疆之任捍禦之權必能奮身殺賊即不幸城破國危而致命遂志又何多讓于平原常山睢陽數公也哉然其心則一也於戲

明湖南總兵彝山周公墓誌銘

明總戎彝山周公歿七十有九年公曾孫少司馬海山公視浙學已三載捧家傳屬門下士蔣士銓撰公墓誌再拜而謹觀之不敢辭按狀公諱如茶字自飴號彝山別號丹井先世居楚之營道縣任元勳萬戶公之祖隱姓名稱伏三郎者為濂溪先生八世孫明初徙居蜀之涪州相公堡生允升公以孝得旌官銅陵令生顯風公由孝廉同守開封生梓溪公官武昌郡丞有治行王陽明撫贛平宸濠勳公轉運有功鑄鐵像于彭家澤萬曆中追封虬侯生誠所公以父勳錄用官神樞四營副將鑿豐城鼎氏封一品太夫人即總戎公考妣生子三總戎公其季也公五齡而孤既長淹貫經史習韜鈴具文武才畧後以功臣子奉命帥師討賊終天啟之代數立戰功明末甲申北京陷蜀有姚黃之寇張獻忠復入川三路犯涪里兒輩嘯夜半撼公扉欲推戴弄兵公叱去之師相王春石公鄉人也故重公適以聘公入幕府因仗劍往從至

慕江奉檄佐鎮將賈聯益恢復各路。明年渡江津。永榮銅壁等十餘縣尋復。捷屢上為忌者中沮。乃駐師。時誠所公以家避亂桐梓。公詣軍門。請以兵馬屬營。并揚某自往省親。旋以病不能返。部卒乃殺揚而散。公方欲收合餘衆。會重慶陷。遂走江津。謁忠國王。公因入幕時。糧蹟久絕。人心洶洶。公勸移師鎮安。就食。徐規進。恥忠國善其議。公于是率兵前驅。所遇無犯。有弁犯法當斬。公為諫止。忠國怒曰。汝替若死耶。公厲聲曰。某死則無敢言之人。若死則無敢戰之將。遂得釋。軍中厲禁。兵弁藏煙草者。主帥坐駢戮。有販客匿煙貨。擔中公偵知。急遣僕夜往屏除。且鞠之無實。盡釋去。既而遵義重慶成都等處。以次收復。皆公功。朝命于是拜公湖南正總兵。未幾。忠國死。偽秦王某將叛。欲羅致公。公逆窺其隱。力拒之。乃以終養解官去。辛卯壬辰。父母相繼卒。康熙初。挈家返涪。乙巳。迎柩于桐梓歸葬。而功名之念。嗒矣。甲寅。滇逆偽帥慕公名。遣幣聘公。擲書罵曰。庸奴我豈從賊者。次子儒進曰。激則致禍。兒試往謝之。至閩中。被留為質。公憤恨成疾。誓不服藥。長子儼出奇計。往來漢沔間。竟挈弟返。公大喜。病為少間。庚申九月。公復臥病。值譚宏勳賊夜半薄公室。二子倉卒救禦。儼被重傷。儒乃殉。夫人旋以慟儒卒。明年都統李某。既擒宏。欲盡殲餘黨。為公雪仇。公亟使尼曰。震霆遍摧。殺戮相報。甯受始殃。勿延終禍。李聞而歎曰。長者也。乃止。公撰著最

富晚年盡焚之。其教子則曰：望汝為一品人，不望汝為一品官。作訓辭及葬山迂言以為戒。疾既革，仰天太息曰：始吾疑伏波囊尸語以為矯，今而後乃知許國者固自有志也。泣然而卒。於戲！公生勝國末季，投筆從戎，歷戰陣十餘載，未嘗殺一不辜，而全活無算。古名將陰功，何愧焉！洎天下初定，公于傾側擾攘間，用兵如神，恢復邊城，滌除凶饑，有席捲風馳之勢，勳名烈矣。顧觀時知止，解甲歸田，賊餌爭投，屹然不動。乃至室毀雛傷，老死邱園，困窮不悔，非道力堅凝能若是乎！涪之人曰：公少時遇道士召使學仙，公不可，乃陸語人曰：功名士也。廿九年後當來導，然勿嗜殺人。厥後昌矣。乙巳冬，復有道士途招之，公請彝親訪從之遊，後雖弗果去，而屬曠歷二日，體尚柔和可舉，或疑為羽化蟬蛻之異。史載李泌不報人仇，張詠前知來去，各有神仙姿表，公其侶歟！惟限于運會，遂令忠義莫伸，槁形牖下，亦可悲已。亦可悲已。公生于萬曆四十五年八月廿九日，以康熙三十二年二月二十四日卒。歷年七十有七。配吳封夫人。子二：儼、康。熙庚午舉人。儒銅梁庠生。乾隆七年，旌表孝子。孫六人：某某。曾孫十人：某某。元孫若干人：某某。葬涪州長里磨陀山莊子儼柩之。銘曰：崇文定蜀，閭井不驚。曹彬帥師，善良弗刑。公兼有之，完節與名。桓桓將帥，久乘富貴。功名不終，禍積為崇。公殷鑒之，角巾而退，不嗜殺人。其後則昌，忠孝之門，節義文章。

振振繩繩。偉哉侍郎。塚象祁連。巴山並峙。公偕赤松。時一液止。七十九年。泐銘為史。
廣州府同知犀文魏公墓誌銘

公諱綰。字帝臣。號犀文。姓魏氏。先世由陝西榆林衛皇甫川遷正定。始祖從信。明季甲戌武進士。官車鎮總兵。殉難。祀名宦。廕一子用權。用權生成。由武科官貴州平越守備。擢遊擊。致仕。遂家于平越。生子四人。次景舒。國學生。配劉氏。即公父也。公生七歲喪母。十三歲喪父。父病刲臂肉以進。居父母喪。皆能盡哀禮。如成人。以孝聞于鄉。公讀書持躬。以明道立德為學。嘗積石牀褥下。藉警酣臥。苦志如此。為文無詭。有法度。見賞于其鄉先生王公士俊。旋補博士弟子員。即登賢書。時康熙庚子歲也。一應禮部試。不第。遂講學平遠。求濂洛關閩之旨。後學習兵部。至雍正十年。試用廣東知縣。令增城者三載。令南海者八載。既而署肇慶通判。調石城令。再調新甯令。一署嘉應州。拔再署南海令。乃擢廣州府澳門同知。越五載。乾隆丁丑十二月十二日卒于官。公歷任二十有六年。所至皆有聲。為其民老。皆能尸祝之。公之政不能備書。其在增城也。曾放囚歸視其母。三日如約至。其在南海也。修建學校。教育士子。文風駸駸。又嘗治某童被殺。獮求殺人者不可得。夢一人以兩手向公作離合狀。乃偵得改革之工。鞠抵之人。以為神。石城有虎食孀婦子。公為文告城隍之神。得虎磔于市。

而奸民廖氏以五虎稱者前官莫能制公盡誅之新甯嘉應澳門之政各能因地制宜開釋冤獄故新甯人嘗于元夕結燈為字以頌娛其官公之德教感人何如也嗚呼幼以孝事其親長以道德教其鄉人及其仕也誠信神明加之以缺至則愛之如不能盡去則挽之如不可及立身有本末居官有體用如公者豈非賢大夫也哉吾又聞公性豪宕以俸錢仁九族不少吝客死者皆力返其喪故其歿也無親疏皆哭之慟夫位不稱德者有後以是知公祚之興正未有艾也公子九人孫九人配熊氏封宜人公生于康熙三十九年二月十六日行年五十有八卒大文乾隆丁丑進士官翰林公仲子也葬公于黔銘曰

孝能事親學足善人而其政復宜于民公苟不信囚胡以歸公苟不識虎胡以繫才足大用于世而官止於斯海南之人恨不得而葬之平越之山何屢屢還神于天藏骨于土隆隆覆夏屋者是為東粵循吏魏大夫之墓

贈文林郎孝子吟臺蕭公墓誌銘

公諱御龍字乘六號吟臺姓蕭氏浙江構李人曾祖侍峯公遷錢塘卜宅西湖遇者指為高士之廬子會嘉公有智畧務施與惠周鄉邑孫二長某字潛起次即公也公天性孝友稟奇慧凡觀書不再讀淹博能文潛起公不善治生家日落食指數十人

公毅然請廢書任家督。乃負米繫絲。操奇贏。走各郡。數年復其產。會嘉公故豪俠。遺約二十人。醵錢為會。凡濟喪葬者。額四十千。嫁者減十千。娶者減其半。慶祝者再減其半。清波門外。周四十里。恃以緩急。舉火者數百戶。行之若干年。天竺靈隱集慶三寺。比邱六十餘房。屢為豪猾侵侮。會嘉公出強力捍禦。淨土得安。市井頑梗。薰公之德。至今以訟為戒。歿時哭而送葬者數千人。偕配周金田三氏合窆于龍門山。公考卒年五十有九。當疾亟。日公廢食。寢不離側。每晨犯曉。入城購人。復閱五旬。以為常。然不可救。乃豫絡左臂。作痛楚狀。或問之。以創發對。夜分跪禱祖宗前。剖臂肉。刃銳斷三筋。昏絕于地。頃蘇。糝土傅之。晨雜復藥。以進。考歛之曰。大佳。吾疾當有間。時九月之望也。翼日事稍洩。考病復劇。閱四日。呼弟用嘉。公屬曰。吾屢以厚貲營穴。輒不佳。父棺未葬。吾豈瞑爾亦子也。當力營之。孫或未可恃耳。言訖而逝。公號恂。數絕臂。創崩裂。糜爛百日。竟無恙。已而哭曰。孫何異于子。遂不能葬祖耶。矢志任之。舅氏周篁坡精青烏術。公時聞雲林暮鐘。戴星疾馳過桃源嶺。甫夜及半。猝遇虎。公伏山亭梁上。虎仰視而去。比至周家。遂偕歷崎嶇。且半載。得龍門吉穴。購以數百金。于是先世七棺俱就窆。窆云。越歲己酉。遷京江杜夷。形家也。偕登楊梅塢。叟指北高峯之西。必有穴。尋往覓得之。即公祖順治初年所購之山。乃以原配俞氏瘞之。初公事兄如

國朝文匯

卷二十八

十一

國朝文匯

父撫兄子二人。教養婚娶竭其力。公年四十餘始生子五人。然衣食恆嗇于兩兄。公荷家計三十年。兄卒後兩兄子謀析產。且盡據其豐美者。公謂長子立選兒意云何。對曰。父讓之以成友愛。兒輩敢競乎。公大悅。乃取荒山數嶂。旁舍數楹。至是全家啜粥矣。公滿漉沖澆。學有本源。以內重外輕。勿求利達為庭訓。平居以善惡報應警惕諸子。歿之日。端坐而瞑。時乾隆癸亥二月初十日。距生於康熙癸丑十二月十五日。春秋七十又一。戊辰八月。偕繼室鄭氏合葬于原配之墓。杭人呼公為蕭孝子。以公遺命未許請。旌。公子立選。元選。宸選。青選。萬選。立選。學有根本。工篆書。兼精名法家言。乾隆庚辰。恩科舉人。壬辰試用江西知縣。歷宰劇邑。聽訟藹然。問會如家人。不稍涉矜躁。得情後雖受撻者。咸叩頭感服去。蓋克承公正學而為循吏者歟。銘曰。中興而家復兮。學成可棄也。斷筋而剖肉兮。臂糜弗廢也。戴星而納麓兮。虎耽則避也。讓產而受福兮。同穴斯瘞也。牛眠而龍伏兮。厥後有熾也。惟孝而大其族兮。茲科當永峙也。

王猛論

張洲

賢智之在人國君用其言則有功不用其言則無功且至滅亡何者其成敗得失之數惟賢者知之而君心時或昏明之異則多欲蔽之也語云旁觀者智當局者迷又曰利令智昏蓋可見焉符堅之於王猛求之切任之重禮遇之隆信用之專論者比之昭烈孔明故能所至有功削平諸國吞併中原已有天下過半至猛臨終遺言謂江南正朔相承勿以為圖堅違其言遂有泚水之恥而國隨以亡觀悲猛之語其曰天不欲吾平一六合何奪景略之速夫猛勸堅不可圖晉而欲平一六合非圖晉而何則其不用猛言幾已見於此時甚矣賢智之言有關國家興亡非可忽也抑予更有感者石勒之有張賓同堅之有猛賓之才可方子房其賢智同猛勸呼右侯不名言聽計從志意投合其禮遇信用同猛顧猛之仕秦人人知之而賓之仕趙雖在學士大夫或且不能舉其姓字則又何也夫以賓猛之才得遇漢高光武其所表見樹立當不止此不幸同事僭偽之主然猶有顧晦之殊悲夫靡為有夏再造第一功臣乃尚書太史公本紀俱所不載僅得左氏傳魏絳旁及之一言然則古今之士之才而不遇遇而不能有為有為而事蹟若存若亡不得昭著人耳目間者可勝道哉可勝道哉

勝道哉

國朝文匯

卷二十八

十二

國學扶輪社印

王朴論

天下未嘗無才而論治者動曰世無賢才者誣也。即當衰亂之世居分裂之國。值傾危之朝。為之上者。苟知殫精圖治。總攬英雄。求賢用才。惟恐不及。自必將有奇傑俊偉之士。仗策而來。應時而進。以相與贊助謀猷。經畫政事。其或虛如無人之國。則其君之未嘗知所求知所用。而固非其時其地無賢者無才者也。特其賢者才者。伏處而不出耳。譬如漁者不施網罟。而諉咎於江河之無魚。樵者不施斤斧。而歎置下之無薪。孰謂可哉。觀周世宗之用王朴。可知已。世宗當五季干戈紛紜之際。慨然求得一王朴而用之。朴為人明敏多智。有謀能斷。迄今讀平邊策。其論天下大勢。決得失。成敗之數。判攻取難易先後之機。瞭若指掌。明若觀火。雖鄙俟漢中之語。高密河北之言。武鄉隆中之對。何以加於此者。惜其君臣早逝。未克竟其設施。然其效已略可睹焉。蓋駸駸乎有削平諸國。統壹海宇之漸。儻天假之年。周其可量乎。則知天下未嘗無才。而論治者動曰世無賢才者誣也。且以石勒為趙。而有張賓。以苻堅為秦。而有王猛。以姚萇為後秦。而有尹緯。以石敬瑭為晉。而有桑維翰。或僻處一隅。如張重華之在西涼。而有謝弼。更微末如高季興在荆南。亦有梁震。而極盛之世。治平之國。登明選公之朝。又不待言。昔漢文帝博辭而思。頗牧馮唐。所以知其不能用也。夫天

下豈有借材異代者乎。明莊烈帝讓臺臣曰：朕非亡國之君，卿皆亡國之臣，嗚呼！用亡國之臣者，誰與莊烈謹身節用，勤求治理，卒以身殉社稷，為漢唐宋亡國所未有，獨其用人，未能辨別賢奸，於其任烏程武陵，宜興可見也。何不觀周世宗之用王朴乎？吾故曰：天下未嘗無才，而論治者動曰：世無賢才者，誣也。

屈蠖軒記

物之屈者不自屈，有屈之者，然有屈之者，而其屈也惜矣。草木之枝或挫抑以屈，水流屈曲，從崖岸之地勢迴旋，古今人屈者多類此。馮唐屈於白首，李廣屈於數奇，屈於命者也。賈誼之屈也，以銳進，劉蕡之屈也，以忤時，屈於人者也。此皆有屈之者，乃卒未由得信。陶潛林逋之徒，儻然物外，則自以屈而不求信者也。袁邵公之在洛陽，謝安石之居東山，則又以自屈而自信者也。顧其所以屈者，本無與於精義入神之微，故其所為信者，弗能彌綸天地之大，彰致用之妙，善自屈者，蝸角之居，十笏之室，可以藏萬變而裕古今，其屈也非徒屈其信也。有獨信，斯不已，卓然有得者哉。南徐劉子漢翔，以奇才博學，交扶風屈矣，自扁署東偏小軒曰屈蠖，蓋取易大傳之文，以寓其意。因集圖書左右，暇日吟咏其中，若是者數年，弗輟。庶知所以自屈者焉。夫其所以屈者，莫可得窺也。吾將觀其所為信者耳矣。

江舟出峽記

蜀萬山區長江行乎其間率不數里數十里即灘無灘不危惟峽灘為甚自平羌峽來入巴峽至夔門所在峽多有惟夔巫諸峽特險且長為蜀路要害云臘月乙未抵夔舟泊觀魚復浦積八陣圖聚石為牆水漲即沒水落行列如畫不可亂亦一奇也迤東至少陵祠憑弔久之登白帝城謁昭烈廟城踞白帝山東連赤岬北近麝香南臨瞿唐對岸白鹽夾江並峙濫瀕堆在其間巨石孤立江心形如獅蹲昂首南向冬時出水餘三百尺聞夏秋咸漲至且減頂或高出數十丈可畏哉瀆谿經赤岬白帝間與草堂谿合紆回入江山谿之流土人皆曰瀆其間即東屯也前為峽門有鐵柱二巴蜀眾水匯流於此杜詩所謂水合數百源者是也丙申午發經龍脊灘濫瀕石入瞿唐峽口峭壁刺天中通一綫壁間鱗鱗然斧鑿痕宛在丹崖翠嶂林巒秀出舟急路轉目難徧給過黑石峽峭窄甚劣容舟行則又峽中峽也諺曰濫瀕冒頂黑石下井信乎危哉至門扇峽即瞿唐東口前有虎鬚灘皆瞿唐險處值風雨晚泊故翁云瞿唐峽中聖姥泉石上一蟻人呼於旁則泉出屢呼則屢出可怪也惜順流迅疾未及一試丁酉晚發過大漢口經泗瀨泗瀨者湖水橫來兩山對立一名錯開峽抵巫山縣隔昌江東南即巫山山形正如巫字昔人謂巫山象形今乃見之良有然矣

篔山琵琶峰相距不遠皆以形象得名。琵琶峰隔大江南五里其鄉婦女曉音律有女子出嫁前夕鄰里合樂送之。蓋土俗云爾。入巫山峽十二峰皆在北岸。幽奇絕倫而神女峰特為娟好。晴雲輕露即離映帶。即朝雲峰也。山前馴鴉送客。回翔孤蓮之上。色如常鳥。形僅比鴝鵒小者。入蜀紀云。八月十五夜月明時有絲竹之音。往來峰頂。猿狖齊鳴。達旦漸止。異已。神女之事。宋玉特以託諷。本屬子虛。吳船錄辨之。誠是。乃謂廟中石刻引壙城記稱瑤姬西王母之女。雲華夫人。助禹驅神鬼斬橫石。疏波有功。封妙用真人。則益誕妄不經。而石湖信之何耶。過三分泉泊萬流驛。有萬流溪發源施州。至北入江驛。因名。為巴楚分界處。戊戌發萬流至巴東。楚塞邑也。江岸秋風亭。為寇萊公遺蹟。經石門關。巖崖間有石門。僅通一人。行過葉灘。峽中名灘。與新灘並稱者。有葉林葉枕。夏時水覆林枕。舟行甚難。今石皆可見。故無患。然湍悍猶令人悸。一曰狼尾灘。東天慶觀前。即叱灘。抵歸州城中。城外蘆石峯巒。無片土寸壤。門臨人鮮。巨石鐵黑色。槎枒淨瑤。縱橫波中。山谷詩云。命輕人鮮。頭船。日瘞鬼。門關外天可怖也。香溪口小泊。尋玉虛洞。溪以昭君得名。登舟過石門灘。白狗灘。入白狗峽。一名兵書峽。絕壁小洞。露出數片石。如書帙狀。東即新灘。俗謂青灘者。三峽首險也。舟人不敢遽過。因泊。己亥。盡出舟中所載人貨。登岸陸行。空舟而下。乃施柱。

為巨浪所摧。泊空舸峽口。明日易純柱。迄未乃發。空舸一名馬肝。峽崖有懸石如馬肝。獅子巖孤舟峰。纖秀妙麗。殊可觀。峽口東瀘灘。湍洄洑。交錯其間。操舟避就。稍疏。即不可知。與忠州之折魚相似。過灘夕泊。辛丑早發。過達洞灘。惡灘也。乃灘際多巧石。取供盆盎。離奇可愛。前望即黃牛峽。過使君虎頭鹿角諸灘。至黃陵廟。傳云神佐禹治水有功。山半有迹。如一人著帽牽牛者。云是其神廟。前無義灘。亂石礫硤。如劍戟。齒齒險絕。不可嚮過。又有渣波灘。五峯石。長林磯。輪頭石。紅石子。險與無義等。蓋黃陵廟上下十餘灘。總名竹節灘。俗謂腰站河。入西陵峽。觀蝦蟆碛。水品所謂第四泉者。過扇子峽。即明月峽。泊平善壩。言灘險已盡。其地平善也。壬寅舟發。抵下牢溪口。捨舟涉峻阪。探三游洞。沿溪登舟。泊至喜亭。是日歲除。三峽之名。說者不一。惟以瞿唐巫山歸鄉為三峽者。是。蓋自灑瀨堆至虎須口。總名瞿唐峽。即夔州峽。自巫山抵巴東。沿江一百六十里。總名巫峽。所謂巴東三峽。巫峽長也。兵書峽。空舸峽。總名歸州峽。即歸鄉峽。而黃牛西陵明月諸峽。則又歸鄉之餘尾也。明日癸卯。為辛卯歲。元日舟停不行。舟子俱宜昌人。數日乃發。過荆門十二碕。虎牙灘。四望平蕪。煙波浩渺。回首五龍雞籠等山。比峽中高峰。茲培樓。正月甲寅。記於荊州之沙市。逆旅。

探靈巖記

略陽值亂山中。層巒觸目。顧幽邃奇秀。供游覽者。厥惟靈巖。予以易舟泊其邑。明日夙興朝食。涉八渡水。循嘉陵江。並崖南行。攀藤歷磴而上。巖洞廣敞。可數百坐。枿樹三株覆崖下。不蒙雨露。高存丈。異哉。前軒三楹。俯瞰滄波。潭者渟泓。灘者湍激。匪一致也。對岸諸峯。嶙峋蔽日。右有泉出石罅。僅豆許。逸松栢間。曰藥水泉。謂飲可已疾。巖半刻。郝閣銘碑。郝閣在縣之白巖。漢李翁建勒銘。鑿懸崖濟行人者。銘隸書。相傳蔡中郎作。未有以知其必然也。後閣廢。路移碑存。至剝蝕不可識。宋李虞卿權興州。懼久而泯滅。刻石靈巖。用永厥傳。泉東南小洞。深不可知。洞口石柱天然。撐拄二洞。隔不數武。而絕壁峭削。不可達也。懸棧以度。闊尺。臨巨壑。行者怖慄。西北隅肖髯令像。髯令永年李氏名德。性明。萬歷舉人。有惠政。縣人不忍忘祀之。勒所自為贊辭於碣。意若自託於桐鄉。可以知其心存不朽者已。頃日落山幽。暮色蒼然。乃還出山。日尚曠也。依來徑仍涉八渡。歸八渡者。一百八渡河也。經者必一百八渡。乃已。故名。農人語。急以簡。第曰八渡。八渡云。庚寅三月二日。

石砮城南石砮記

萬安山東南可三里。一峰特起。高視萬安倍。且五之。為石砮山。山下有溪。源遠而波細。流經其北。趾抵萬安山麓。合南濱。曰東匯溪。循溪口而東。可上。盤旋數折。上有池。

國朝文匯

卷二十八

十五

國朝文匯

深五六尺。澄澈見底。游魚上下。歷歷可睹。池旁埤垸之迹。廢然蕪莽。井間頽圮。僅有存者。巖畔鑿孔。巨石為壑。旗磯。即石砦故址。顛頂地席藉。三面臨絕壁。俯視千仞。北有徑可登。望之數百里之山。攢積重疊。出沒隱顯。皆可指數。蓋石砦近城諸山。高且險。無逾此者。傳為女士司。秦良玉屯兵防寇處。故土人曰石砦。明崇禎庚辰。流賊犯蜀。獨撥甚。良玉單騎見撫臣。議欲以著帶盡發。溪峒白桿兵。土司調兵。急則以著能食者。犀至也。更急則以帚掃出境也。撫臣以無餉謝。良玉泣而出。後復請益守十三隘。當事不許。而全蜀以陷。乃據險守固。戒所部毋得從賊。犯者族無赦。賊偏招諸土司。而莫有敢入石砦境者。鄭都忠。萬人多依之。卒賴保全。使其計行。賊必不得入蜀。即使入蜀。可戰而卻。蜀必不陷。沒何至寇氛彌熾。荼毒生民。使成梓果。閩諸郡。汔無噍類哉。經其地。攔行道臺。猶可慨然。想見其忠勇。而歎奇謀之不果用也。乾隆癸巳十月二十五日。同遊者二客。皆造極而止。

烈婦鄭氏傳

吳紹曾

烈婦鄭氏世居嘉興郡治南之雙節巷年三十歸平湖貢生胡世棠怡亭為繼室怡亭本世族其居家有禮節烈婦初入門即能體怡亭意事姑得其歡心怡亭故有妾烈婦遇之甚善踰三年姑歿未終喪怡亭卒無子其明日烈婦自縊以殉時乾隆甲申五月十六日年三十有三方怡亭之歿也烈婦已號慟昏仆者再猶強起憑杖衆立怡亭兄子某為嗣又經紀舍歛具甚詳悉死之晨飭教匠事猶井井也日將午語家人暫登樓少憩會嗣子以需某物請叩門久之方聞聲效聲已而門闢烈婦旋下樓哭泣如常及復登樓已日晡矣抵暮家人請燭於烈婦叩久不應扶門以進見烈婦服釵自懸於臥榻前急趨救氣已絕及檢榻間有嫁時衣一襲其領緣及前襟多流涎血涿歷歷可駭家人終莫解其故余執友張君子遜為余述烈婦事且曰殆烈婦初縊時御此服蓋舉居恆所宜殮者服之也既又念姑服未除夫方小殮復下而易衰絰以就死焉誠哉子遜之言也夫婦人以身殉夫者往往悲楚激烈卒就死所已足為生人至難之行而乃縊而復下下而復縊倉猝間斷然不苟有如此要非察理至精而行之甚安者必不能也然則烈婦之所以自處於平時蓋可知矣怡亭之所以式教於家更可知矣

吳紹曾曰。夫子之傳易也。一則曰妻道。再則曰臣道。致身之義均焉矣。前明流寇之難。檢討汪偉妻耿氏與偉同縊。偉就右。耿氏就左。既投纆。耿氏復揮止之曰。雖在顛沛。夫婦之序不可失也。正位而死。其從容就義有如此者。若烈婦之易服。再縊。殆庶幾焉。宜乎殉之。日卒未嘗或介。幾微於辭色間也。乃直書所聞。以質子遊。所以撼吾黨欽仰之意於烈婦。又何加焉。

袁貞女傳

貞女秀水人。姓袁氏。康熙庚戌進士吏部文選郎中諱定遠之曾孫女也。父某早喪。偶納某氏女為妾。生二女一子。貞女居仲。乳名金姐。許字同里萬氏子某。萬世族有寡母者。育孤而長。聘貞女三年矣。年十九病瘵。貞女聞。即以死誓。且語其姊曰。吾必為萬氏鬼。及萬氏子卒。貞女號泣欲往視。含飲。父母不可。貞女一晝夜哭不絕聲。勺水不入口。將投纆死之。父母不得已。命妯娌詣萬氏。萬氏母堅謝曰。貧不能自存。又奚以字婦。父母又以語告。貞女哭對。兒故知其家貧。第往即餓死。兒亦甘心也。遂適萬氏。其所服役。出之篋中。蓋貞女知萬氏子病不能起。已預為之辦者。至則憑尸哭踊如禮。朝夕居喪。次不遺。父母憂貞女。即就死。假鄰家一女奴守之。貞女謂女奴曰。我胡然。我姑老。又無以為活。我將執女紅以終事我姑。每見姑哭。子過哀。必多方慰。

之踰年貞女忽病歿是為乾隆九年某月日年僅二十嗚呼自古在室之女婿死不
嫁。縣而以身殉之。知禮者往往引經為斷。謂是賢智者之過。而卒獎其扶植人倫。為
士君子所樂道。若予觀貞女所處。為尤難也。夫一時義勇所激。毅然從死而不悔。所
難者從容之死。靡他耳。乃或者依託有人。以終未亡。抑得嗣子以安。同穴又或幼讀
書。識大義有然而貞女不爾也。其所出也。概既乏母氏之教。父亦庸謹無能。未聞奉
先世遺澤以誠貞女。家故赤貧。以緣履鋤口。為萬氏者。又絕少強宗。足以庇寡立後。
而貞女獨不為一往激烈之槩。直欲仗女紅以終事其姑。所處非尤難者耶。嗚呼。其
性使然。其不幸踰年以死而未竟其志也。吏部為予曾王父給諫公僚友。而貞女之
從祖母。又予婦諸姑也。其得之也詳。故當貞女之死。心許立傳。今忽忽十年矣。昨聞
其母弟死無後。因傷吏部之裔不絕。如綫。為訪萬氏母。已貧老垂死。懼貞女之遂即
湮沒也。書此以備載筆者採擇焉。

宋太祖論

程大中

言有甚美而不適於治。踵而效焉。而害滋甚者。不可不察也。宋太祖幸洛。張齊賢布衣獻策。頗稱旨。既而怒其堅執。斥去。歸語太宗曰。我幸西都。惟得一張齊賢。吾不欲官之。他日可使輔汝為相。嗚呼。此言之甚美。而不適於治者也。天之生賢才也。如衡量然。小治亂必有人在。其下應之。不相借。賜而人主之用之也。若病者之於醫。餓渴之於飲食。少緩焉而不得。太祖規模初立。其於治。豈不汲汲哉。方病而遣人醫。方饑而餽人食。雖愚者知其必不可也。宋史曰。太祖之心。公天下之心也。或以謂不然。恃恣其堅執云爾。夫太祖願治之君。有從諫弗拂之美。以小怒棄大賢。或不至是。就使真為公天下於太宗之心。其於用人。致治之遠。則悖甚矣。齊賢不足用。與棄去不顧可也。若以為足用。即自用之。以次相及。他日非太宗之齊賢乎。如曰。故抑之以老其才。則齊賢之策。既已稱旨矣。仲華之於漢。景畧之於秦。類以年少立。談贊成大業。用人而必於龍鍾衰老不堪事之後。吾不信也。齊賢亦幸而用耳。萬一不幸。沈淪湮鬱。早死牖下。或放言自廢。絕意不肯復出。又不幸使小人聞其說中傷之。終身阻滯。公天下之心。安在也。故曰。太祖之言甚美。而不適於治者也。傳曰。見賢不能舉。舉而不能先。慢也。使夫人之於賢。不舉不先。安然而有所藉口。太祖之言為之也。嗚呼。其害

可勝道哉

洞庭濯足圖說

吳子鳳浦圖其小照曰洞庭濯足或疑其所用者小而所取者大為虛擬而失實予
以謂此拘於方者不足以知鳳浦也今夫物之相為用也必其力足以相勝鵬之用
風必於扶搖鯢之用水必於蓬海蓋非得夫寬然有餘者以游其生則鯢與鵬甯終
身不徙而其力之大苟不足以勝夫風與水之寬然者亦不能用其餘也其在於人
周身之用而百族備焉耳目之所留連性情之所寄託皆不能不寓於物物之待用
也或在千里而遙或在咫尺之際一皆渾然並列以俟夫人之取給而有餘不足之
故不能不視其人器量之大小而聽命焉大者之不復取小亦猶小者之不能用大
也是故風之扶搖也凡為鳥者不能至也而鵬用之以為苟可以飛而已海之蓬凡
為魚者不能從也而鯢用之以為苟可以徙而已洞庭之大衆人之所駭視而却步
也而鳳浦用之以為苟可以濯吾足而已此所謂湖海之士也其胷中之奇吞吐出
沒於瀟湘雲夢之間者無所往而不寓故隨所寓而適足以用其餘彼亦惡知夫洞
庭之為大而濯足之為小哉即又惡知夫洞庭之大之不適為濯足用者而拘於方
者甯足以知之與或曰洞庭始波木葉微脫悲秋者以之或謂鳳浦潔清之士惡夫

涉濁流者之行吾足也。故於洞庭有取焉。吾觀鳳浦為人和平樂易。於秋宜無庸悲。如其託乎清流。則絕潢斷港。何不可以濯吾足者。而必洞庭之為哉。吾惜夫拘於方者。知其一二而不足以喻乎大也。故為之說以解之。

藥村詩鈔序

李子藥村。屬予序其近詩。越三年矣。予久負諾責。而藥村之詩。亦復私之篋行。若與予言相待者。蓋其自視所為。與視予之言。皆不苟如此。方藥村總角時。與予為文酒之社。登山臨水。刻燭引杯。藥村未嘗不在。興會所到。隨物賦形。愈捷愈巧。一時能言之士。少復過之者。及予北走燕趙。西適鄆郟。負米蘄黃間。罷詩不諱者殆十年。而藥村方屏跡漢江。輟落人事。日與鶴關念堂諸君。講明切究。其詩乃益以進於古人。予既歎予之廢棄。於是為可惜。而又幸藥村之久於其中。不少易者。為卒有以至於成也。嗟夫。自古文章之變。不壞於老成。而壞於年少。負意氣務為可喜者。蓋入之也。未久。其所得已不深。而復以意氣持之。則學問之途。不能以博其趣。而性情之感。無由以得其平。於是謫異於篇章。摺摭於字句。要妙於聲音節奏之間。以求可喜。而其蔽乃有不可勝窮者。紹述之於文。長吉之於詩。昌黎雖亟稱之。而卒不能不詭於正。成於年少。故也。向使由是而之焉。淵然充以學問。更幅然理於性情。其所得豈直如彼。

而已哉。藥材惟入於其中者久。故能用古人之長而去其蔽。而所得者深。故愈久而愈若不足。而不苟於求一時之知。今所抄古今體詩十二卷。皆從漢上得之。年少可喜之作。亦已不存。而予與藥材各有四方之趣。回想平生尊酒過從。其樂蓋不可復得。而予又安能已於言耶。

陸筱飲詩集序

癸未冬。晤陸子筱飲于沱陽。得讀其所為古今體詩。予既喜見故人。而筱飲欲使予名附見于其集中。以志其合志同術之義。屬予編次而為之序。明年將遂歸錢塘矣。筱飲少負盛名。推本經術。足以有為。及科舉之文。屢不遇於有司。索米四方。東道齊北走燕。留滯於楚。所過山川都邑。風土人物。往往皆見之。其為詩也。則往往荒江醉臥。虛市夜起。踟躕乎秋風。徬徨於迥塗。每吟一篇。嗒然若失。嗚呼。此亦困頓無聊之所為作也。而筱飲夫且攤書對酒。掃地焚香。筆墨之娛。交遊之樂。無日無之。而不知其身之在羈旅也。惡知夫遇之窮。然不知其窮。故其氣定。其氣定。故其神和。其置力也常專。而優游以入其中也。常從容而有所得。聲音節奏之善。蓋有莫知所由然者。宜其詩之工也。嗟夫。詩之變也。莫不始於憂傷。而終於怨誹。大抵皆窮於遇者為之。故士之窮者常多。而詩之工者常少。或工於其辭。而其指未善。其指雖善。而語益

其分事失其真音流於激者皆詩之變也君子無取焉讀彼飲詩者可以思其故已
彼飲科舉之文清曠絕俗所在有名或一旦過於世未可知雖然若彼飲者故不在
乎遇不遇也予獨怪論詩者知詩以窮而工而不知詩以窮而變知詩之工工於窮
而不知夫窮而不知其窮而詩乃工也故序次其集而推論之以告夫凡為詩者

迺逸堂詩稿序

迺逸堂詩四卷邵子鄭圃客吳中作也朱君布如得其稿本假予讀之而鄭圃適至
漢上遂與定交云鄭圃于書無所不讀慷慨善談論喜飲酒不拘繩尺平生於文章
頃刻立就初不屑意而詩獨刻苦為之朱君嘗與予言鄭圃為人豪放而詩謹嚴灑
跡衆人之中不避塵俗而詩清逸與人遇無復款曲而感舊書懷之作性情深厚讀
之惻然蓋不可測若是予以謂此鄭圃之詩所以工也古之作者莫不善變善變者
莫不攻其所難入而去其所可喜韓子之文疏通正大如其為人而其為詩縱橫排
奩光怪百出所謂攻其所難入也子厚屏跡荒裔感慨無聊不平之氣盡見於文而
其為詩古穆冲澹論者比之淵明所謂去其所可喜也是故詩之敝也莫患乎因其
性之所近與用其才之所長苦其難而無復入是恣其性而已矣得其近似而沾沾
焉自喜是任其才而已矣恣其性任其才初莫之變而詩未嘗不工者自鮑參軍李

翰林已下。不過數人。不然其弊將至於苟且率易。叫囂張皇。若明季詩人之互相雄長者。是也。然則謂鄭圃之詩不可測。固即其詩之所由工也。與鄭圃往來。江漢垂十餘年。與予交甚晚。而持論甚合。故言其作詩之指如此。抑聞之。嗣宗之放達。而通於易。杜元凱日在行陣。而長於春秋。皮襲美之詩。不過如陸魯望。而能尊孟子。董子之著玉杯。廣平之賦梅花。皆不復類其為人。而皆不可測。鄭圃方且肆力於古文。變而不失其正。予又惡乎測之哉。

論名上

陳謨

讀范文正近名論已發明名之為益而破拘儒之見矣然第就在上者言似尚未盡故書此三章以補其闕

古昔盛時懸名以收天下之士而天下之士莫不竭蹶奔赴乎其間夫庸衆人之逐逐於利者固無與於名已其自中材以上知以言利為恥者一隆之以聲稱優之以品目則欣然喜躍然起有不期然而然者先王因其勢而利導之謂名不特非君子之所禁且亦有志者所緣強勉飭厲以循乎實之途也故樂得而寓夫振奮之權夫無所勸而為善無所畏而不為惡者天下固有幾人即幾人者祇不競乎名亦未嘗以名為累而思欲避而去之者也且其所謂名者果何由而致之哉周禮以鄉三物教萬民而賓興之曰六德知仁聖義中和也曰六行孝友睦婣任恤也即其次亦曰六藝禮樂射御書數也興乎此則父母樂之鄉黨榮之朝廷寵之不與乎此則父母恥之鄉黨賤之朝廷棄之是則名也者名其實也當世之名即後世之名也使天下人人而好名天下將人人而不失其實矣名何負於人哉孔子曰君子疾沒世而名不稱焉疾不稱則其樂有稱也甚矣孟子曰聲聞過情君子恥之恥過情則其於不過情者固以為宜然而受之不疑矣聖人之所以教人與明王之所以厲世夫豈有

二道歌

論名中

三代以降。政教日衰。迄於戰國。而寡廉鮮恥之徒。接迹於天下。歷漢三百餘年。黨錮諸君子。始競以名節自厲。唐宋明中葉。亦頗類此。雖其間用意過當。不合聖賢中正之道者。十人而五。而矯飾偽託者。流亦世所不能無也。然而忠孝廉潔之詣。賴以不墜。其益為己多矣。斯豈非名之所致也哉。顧於此時。褒貶予奪之權。不操之上。而操之下。鄉黨學校之中。日陳斯人之行。而較其短長。有所善則雖寒素貧窶。終其身而儕輩為之推服景仰。俾發聞於遠近。而不之掩。其有不善。即以卿相之貴。勢力之雄。未嘗有所震懾委曲。而持清議。諤諤不可回也。自非中人以下。蕩然無復恥心之存者。誰則甘不齒於人羣。故夫名之所在。即利之所在者。君子不以近利而委靡頹廢。以自逃於名之外。名之所在。未必非害之所在者。慷慨好修之士。亦未嘗不强其所難。以避他人之訕笑。而就其稱譽之榮。然則先王之時。與漢唐宋明風俗之盛時。雖名於朝與野之不同。而所藉以維其實者。無不同也。奈何後世儒生。過為高論。動曰名非君子之所尚。嗟乎。名果非君子之所尚也。則夫誅奸諛。發潛德。史氏之筆削。亦何必垂法戒於將來哉。

論名下

漢唐宋明之季。安得有好名之人哉。有好名之人。吾以為必能其實者也。夫所謂矯飾偽託於名者。上欲以之市榮利。以肥其身。次亦以悅衆人之耳目。而取重於閭里間耳。二者無一有焉。則望望然去之矣。夫漢唐宋明之季。其朝之上。寵榮顯貴焉者。無非佞邪無恥。決裂禮教之徒。而鄉閭人士。亦遂習以為風。父勉其子。兄勉其弟。曰識時務者呼為俊傑而已。於斯時也。一有持清操厲廉隅之士。出乎其間。衆且非笑之。嫉惡之。而俾斯人無所容其身。是即質勝中人。平日感發於讀書稽古。命意較然。一旦涉歷世途。身嘗况味。亦且退然自沮。思所以貶志改節。而不櫻流俗之忌矣。又過矯飾偽託者流。其揣摩最熟。其營求最巧者哉。然則嚶嚶自負。知慕乎古。不知慕乎今。欲附聖賢之譽。恥為庸愚之歸者。豈非所謂衆人皆醉我獨醒。衆人皆濁我獨清者乎。雖或其學問未底於純粹。言行未能以相掩。而其拔俗之概。視猥瑣齷齪者。已不啻霄壤之於土壤。能其實者。舍斯人誰望焉。則使孔孟而生於斯。必將引以為徒。而獎勵樂育之。不謂誦法孔孟者。執其迂拘之見。而一以好名斥之也。夫儒先之言曰。甯與聖賢爭理。不與流俗爭名。特是好名而櫻流俗之忌者。則其所好之名。即聖賢之理而已矣。吾願誦法孔子者之審之。慎無與矯飾偽託者流等類。而齊觀焉。

爾

龍湫山人像贊并序

潛夫李先生自甲申後。遊跡龍湫山中。髡其首。被闌黎服。自號龍湫山人。屏足不入城市。感慨抑鬱之氣。一寓之詩。高風峻節。奕世下猶凜凜焉。當是時。吳郡徐侯齋先生。海鹽巢端明先生。并吾邑馬彝仲先生。與先生共四人。數百里中。遙相望也。皆前明舉人。未嘗食朝廷之祿。服朝廷之官。而君臣之義。無所解於其心。至於凍餓且死。而未始稍變。抑亦可以繼夷齊而為百世師也已。余嘗謂治平之時。無所謂隱士也。其謬託為隱士者。非怪迂者流。即清閑自適之子也。惟夫變故忽遷。義既不得。如有官守者之死。而又不可如尋常之民之樂而生。則含酸茹苦。瘁其體膚。以求不欺於心。其斟酌非苟然矣。余親明末一時逃爵祿。服居士服。未幾造謁王侯卿相之門。則又謬希隱士之名。而竇鄙夫小人之無所據者爾。四先生輩必惡之。訾之。而不屑聞之。四先生中。侯齋先生及先生名尤盛。士林雖頑懦。亦各競相欽仰。蓋人心之公。不可泯也。況忝為同里後學。且稍知自飭者乎。丁酉春正月。先生之從曾孫某。懸先生像於中堂。謨過之。謹再拜而為之贊曰。

其貌清癯。其意嗟吁。何我生之不辰。值故國之為墟。雖未嘗析珪而撻為。亦已曾名

列乎賢者。其不為仕宦者。所以報舊君之養士。其不為激烈而自戕者。知堯舜在上。而能容夫巢由之徒。爰屏迹於草野。甘凍餒而寂居。嗚呼。先生之歿於今。蓋一百十有餘年矣。猶使人履其遺像而為之懼然。自劬夫廉隅。

逸雲三編序

薛者廷

自余居京師七年。慎擇交遊。故新知者特寡。獨于吾秦中獲二友焉。一為李子西京。其一為詩人楊君子安。君為潼關函東先生曾孫。世以詩業其家。至君而益大。起家進士。再出宰。輒註吏議。今復官湖南。資廉祿以養。又重賦悼亡。膝下僅兩弱女。其遇不可謂不窮也。然其詩愈益工。其在都。與西京共棲僧寺。西京性豪邁。善書。喜客。戶外之屨常滿。言偶不合。即怒而大譟。君文弱。如不勝衣。終日閉戶焚香。丹鉛不去手。其操性不同。如燕越。然而相得甚歡。酬酢之辭亦甚夥。余兩善之。而皆未之能學也。兩君皆不能飲酒。或為余設尊。間出詩文相商榷。談諧至夜分不倦。因有偕住華山之約。余笑而諾之。未幾。西京出宰肥城。君亦將涉湖湘。而余先以大考去官。就浮家於山左。旬月之間。襍被四出。顯晦殊趣。視曩時之談空說有。酒碧銜紅。茫茫如隔幾塵矣。夫以京師人才都會之區。而交道之難如此。一旦時過境遷。逸馬不可復追。况使兩君出求之一郡一邑。而余歸求之一鄉。其可得耶。西京之詩壯健有奇氣。如其為人。君詩工於言情。密於律法。平生宦遊半天下。身所閱歷。學與之進。一切感事情。榮悴悲愉。皆以發之於詩。逸雲初集梓行已久。近於巾箱。出三編。屬為論定。余乃備詳交情之可感。以贈行。即以為序。蓋余與君之投分。非徒詩也。宋張忠定公過華

山希夷先生曰。子神仙中人。然失火家方待君救。可不赴耶。君志篤於遂初。而勢有未可。勉以答楚人之望。余方謀筆耕養親。以待君。他年倘相遇於蓬華仙掌間。當煇除語言文字。相與探性命真源也。并寄訊西京。以為然否。

南林張君墓誌銘

嗚呼。萊峯張君之與余。如唐韓宋蘇之同值磨蝎宮也。今則生並世而同里也。學同師也。癸酉鄉試。不同榜而同舉者哉。廷對。皆同丁丑也。余官廣文二年。在翰林七年。而君為邑宰。至數。左降學職。未上。余以此始。君以此終。皆潦倒終無所就。又聞不同也。同方同術。而好會日淺。今年同客膠西。談燕者累月。而竟恤恤焉。問其疾。視其含歛。諾公子之請。而預銘君墳。樂未極而生悲。尤事理之至常而至奇者也。君家武功。去雒南五百里。未由相識也。歲庚午。余入關中書院肄業。主講者孫西峯師。而君以鄉里負笈從。論文會講。晨夕觀摩。屢自夏首迄秋之半也。咸進士後。君歸班。迨守部需次之時。而余已罷歸。出入相避。動如參商之不相見也。君通於學。而養於仕。初授西粵之修仁。再補吳興之德清。中間南北奔走。勞苦顛頓者。行數萬里。歷二十餘寒暑。而兩任曾不滿一歲。其坎壞視余尤甚也。失意於上官。不必調。而調。不必送。部引對而咨送入都。皆非人之所為。而不必致憾於臧氏之子也。然君乘寬閒之歲月。

薄宦壯游。西至蜀。南極瘴鄉。往來吳越荆豫。以至燕趙。而終老於齊也。山海足以供其雕鏤。悲愉足以發其精彩。泮礪而澁滌之。又安知非天之玉汝於成。而將以大昌其詩文也。文宗八家。而以左史堅其骨。詩湖三唐。而以騷選疏其氣。蓋已哀然成集。而卓乎可名一家者也。嗚呼。富貴者天之所輕。而獨若斯人以名然於兼得者。愈思有以挽敗之。如君之抑塞於生前。而彰徹於身後。人所不忍。而造物且或為之寬假也。君幼而穎特。長而敦敏。與人無町畦。而善善則長。達於政事。綽綽而鬱不得施。澤未被於民物。為可惜也。罷官不歸。久客齊魯間。掌嶧縣膠州書院之教十年。皆以小阮德潤君為東道主。正身率士。經指授者多騰達以去。而興學擇師。共戴使君如文翁高朕。信其匪藉公帑以優給私親也。君之疾也。妻子護之謹。其歿也。親賓門弟子哭之哀。辨香翦髮。陳牲而酌酒者。經月不絕。尊其教而欽其德。固不徒門牆之髦俊也。君之名曰洲。字萊華也。又自號曰南林也。卒之歲丁未。為乾隆五十二年七月廿一日。緋甲初周。而不至生之辰者兩月也。考曰文學金貞妣楊氏。繼母馮氏。草恩贈封正七品。如君階也。配康氏。系出對山先生。以貴且賢。得附見也。子樹楠。縣學生。孫照著。將奉母扶靈輻以歸。而莫諸佳城也。祖以上世次名行。見於酉峯先生所為贈公墓誌者。不再詳也。嗚呼。余與君生平遭際。十同六七。則文筆雖拙。而銘君者。

誠莫余宜。倘亦君之志也。銘曰。

物之用。當其無宰官耶。迺文儒雲錦段。明月珠。執經心。濟史燠變齊魯。春風動竹林。
款帶草紆。我之來。暴酒娛。作元晏。丹黃勅。事未竟。鵬坐隅。靈之殿。召而趨。神超越。柩
載塗。柳翼導。經杖扶。武功天。杜枌榆。聽楚些。盍歸乎。

國朝文匯乙集目錄

卷二十九

彭光斗

字黃園號退庵江蘇溧陽人乾隆己卯舉人官知縣有雲溪草堂文集

六國論上

一

六國論下

一

芮處士傳

二

段烈婦傳

三

錢青選

字環巖號澗石江蘇陽湖人流寓雲南

方孝子傳

五

烈婦楊氏傳

五

黃紹統

字燕勳號翼堂廣東香山人乾隆己卯舉人官瓊州府教授有仰山室集

古羅崇愛編序

七

明經李樸庵墓誌銘

七

張遠覽

字俸睦河南西華人乾隆己卯舉人官鎮遠縣知縣

理君安和傳

九

劉秀才傳

九

為山先生傳

十

張可庭先生傳

十

劉公祠墓碑

十一

李彥平墓誌銘

十二

胡望溪墓誌銘

十二

胡廣善

字受毅號心泉安徽歙縣人乾隆乙卯舉人有新城伯子文集

江孝貞女頌

并序代金司勳

十四

書胡孝子事

十四

方君晞原權厝誌

十五

張

望字後壇號剛樞江西武甯人有附榻先生集

十七

原命

茂才

十八

鄉治

十八

知人難

十九

堅垂問

二十

送魏梅山歸龍津序

二十一

盧大夫傳

二十一

追葬鴛渚序

二十二

吳高增

號敬齋浙江秀水人著有敬齋集

遊柯山記

二十四

曹文植

字近菽號竹崖安徽歙縣人乾隆庚辰進士官至戶部尚書諡文敏有石鼓研齋文鈔

崇樾鮑氏宣忠堂支譜序

二十五

非園自記

二十五

遊黃山記

二十六

國朝文匯乙集卷二十九

六國論上

彭光斗

昔人或咎六國以割地賂秦而亡夫豈然哉余謂六國之亡自亡也非亡於賂秦也土地者諸侯之大寶也賂人者人主之大辱也無故銷大寶冒大辱自速覆亡之實禍六國雖愚不至此然則其賂秦何耶曰彼將以救亡云爾里人有擁萬金之產者昏夜巨盜踵門燭其廬將繫主人而戕之環顧僮僕鄰里胥惶駭辟易莫敢救即救且不免不得已分與金帛為好言以款其去亦情勢之常宜無足怪吾又嘗歷考戰國史記諸書見夫諸侯之地之入於秦秦以兵力取之者十八九諸侯自以其地獻者十二三而惟魏居半焉蓋魏地近秦秦不得魏則上郡關中之險與魏共不能扼吭以制山東以故魏被兵於秦迄戰國無甯歲一大敗於衛鞅而河西獻再大敗於白起而安邑獻三大敗於穰侯而南陽又獻蘇代云以地事秦猶抱薪救火薪不盡火不止此言持為魏危之然魏固無如何耳他若韓與趙一再賂秦楚屢構秦禍亦僅再割地予秦齊事秦最謹未聞割地燕獻督亢圖在垂亡之日並非魏比然則六國未嘗概以賂秦為事也而論者猥執辨士一偏之說譏其不戰而亡過矣且即以賂秦論亦未可逆指為亡國之計也昔文王獻洛西於紂而周以興勾踐掃境內事

吳而越終竊韓魏之先不拒智伯請地卒滅智氏而分其國老子云將欲奪之必固與之獨不聞曩者秦亦嘗賂六國乎孟嘗之師一叩函谷遽從樓緩議割河東三大縣以講於諸侯當此時也秦方惴惴焉慮六國之亡己也究之秦不亡且能亡六國則是割地不足以病秦夫割地不足病秦而獨以病六國亦多見其好以成敗論人而已然則六國何以亡也曰六國徒知賂秦可以救亡而不思自固其本其君臣上下惟晏然以偷安縱欲為事而又與兵構怨互相樓伐猶抱已死之症加急劑焉是之謂自亡也己自亡者安往不得其亡而豈繫秦之賂與不賂哉

六國論下

療病者方也為方者醫也昔者嬴秦恃其強大為六國害諸侯王於是會於洹水之上共議擯秦約秦伐一國則諸國出師救之當是時王侯將相咸拱手奉約唯謹秦亦不敢遽出兵窺山東天下稍安是合從者固六國救亡之良方也而其合之不久則以蘇秦為之醫天下有良醫焉其視人病先審其致病之由為表為裏以藥投之不再劑而其人霍然無復患苦夫六國之易散難合何為乎病不在外証而在內潰也其所以內潰由利害之說構之也構楚者曰君曷嫁害齊者曰慎勿利歸楚構日積則釁日開釁日開則樹敵多而勢益孤秦伺其孤而多敵則媒彼間此使怨

己者轉而親己畏己以陽關六國而陰制其命此內潰之禍也為蘇秦託力能大合諸侯宜正告以先王睦鄰之誼次動以吉凶同患之情毋貪伎以啟爭務敦信以全好使六國坦然如骨肉之不相忌則不靳擯秦而秦自擯何必身主敦樂購書函谷以虛聲相恐喝哉計不出此觀其所與羣侯言者仍無過休以害而啖以利譬諸人方病狂反飲以發風動氣之藥其狂將益甚矣故合僅一年而秦遂誘齊魏伐趙且夫發合從之議者誰乎吾能發之必能收之當趙受伐時秦固儼然在趙也誠如燭之武之救鄭挺身往說齊王曰趙兄弟之國不可伐背盟者不祥臣恐天下義兵羣指於齊矣且王毋以魏解也魏弱遭秦其畏秦而唯所驅使曷怪齊固與秦兩大諸侯王無不延頸跂踵樂奉大王之高誼者一旦冒不韙之名效弱魏之醜臣竊為王羞之且趙亡是齊自撤其蔽不亡而地亦半折於秦與魏王特以空名市實禍甚非算也大王幸聽臣按甲不進魏必不敢獨助秦因與趙合而擊秦天下聞之咸多齊不受秦欺亦共起擊秦則此一舉而脅魏抗秦全趙仲大信於天下桓文之烈不過矣能如是而秦亦庶幾轉敗為功者矣胡乃說辭脫禍來往燕齊卒未聞為趙畫一策史稱秦智過人吾不信也昔魯仲連客趙秦圍邯鄲急趙議帝秦仲連聞之往折辛垣衍却秦軍五十里彼一布衣而排難解紛義動王侯若是曾謂躬佩相印為從

約長者。說力反出。連下哉。嗚呼。合從非盛世事也。而六國賴以救亡。君子猶取焉。不幸所任者秦。始既謀之不臧。繼且委之而去。從散約解。終戰國不能復合。以迄於亡。諺云。死病無良醫。信夫。

芮處士傳

邑故處士芮城。字巖。君農家子也。幼隨父遇村塾。聞羣兒讀書。繞一編。各為覆誦。如流。乃令就學。補縣弟子員。旋食餼。是時明社將亡。流寇訶海內。惟江左半壁晏然。知名士方咸。修壇坫。互相標榜。而城獨與同邑陳名夏。趙理之。吳頌彭。旭。史燧。馬世傑。世俊等。合社講學。以忠孝大節相切劘。稱瀨上十三子。會甲中之變。城日偕諸子。哭臨縣庭。嗣聞京城破後。朝臣或遁或降。而名夏官給事中。亦污偽命。則益悲咤忿忿。恨不獲以布衣殉國難。而又惜同學之守節不堅。為桑梓玷也。爰賦滄浪吟數十篇。且歌且泣。傍徨澤畔。聞者擬諸謝舉羽。西臺之作云。福藩稱制。捕諸從逆者。名夏逃歸里。詣城。城面壁臥曰。君亡不死。安用子見。名夏跽且哭曰。嘗再縊。不幸為救者。誤城厲聲曰。胡不三。亟麾令去曰。吾不忍鳴汝罪也。城自是遂與諸子稍稍異。尚獨行其志。及我朝。受命龍興。諸人多以文章勳業。奮跡自庸。而城已謝諸生服矣。既名夏枋中樞。屢專使以大魁招城出。不應。隱居荒野。幅巾裹髮。終身弗變。初名夏之

歸自北也。彭旭率同學攻訐之。過後修郤。將中旭以法。既成獄。適奉 敕來江南。城乃乘肩輿往。而扁其外。名夏喜。遽出迎。叩何言。城隔帷語曰。從公乞彭旭耳。名夏立應諾。釋旭。訖不一見而返。城高才。於書靡不讀。嘗有賈揆二十一史。截僻句挑之。城應聲指卷頁無一錯。賈不取直而去。一異僧自遠方來。博辨罕對。比推七十三甲子。溯麻元僧大數脈。乃下拜。或曰。僧故崇禎朝名進士。隱於浮屠者也。城之學博而能醇。經史疑義。考證尤精。具載匏瓜錄。他著述尚廣。多散佚。半為人更名刊布。其沒也。前一日。階前紅牡丹花盡白。

論曰。余童年謁里中鄉賢祠。見芮先生名。哀然首列。心竊異之。長而讀其文。訪其生平軼事。乃知先生固以處士終者也。夫先生之志節矯矯若此。設早通顯於世。成仁取義。當媿倪馬諸公。並光國史。甯僅以處士俎豆一鄉哉。然吾意陳公有知之。轉悔不為處士也。

段烈婦傳

余來京師。聞中州有段烈婦云。烈婦盧氏。少歸段。籍隸河南延津縣禮鄉村。家窶。夫傭食。他往久不返。氏獨撫子女紡績為生。所居泥棚二堵。堵以外皆隙地也。同里有無賴者。瞞氏子處。數數往挑。不應。遂於昏夜穴牆入。氏驚起。叱之。急手掩氏口。非

偷也。勿叱氏怒。嚙其指。無賴者負痛。掉而搯之。壁隅氏氣結。徐吐指云。姑釋我。及起。則抵捍益力。無賴者知不可奪。憤甚。攬繩束其喉。三市之。復取絡柱。緘連刺氏腹。乃死。迴顧小兒女。踞炕嗚嗚。慮其啼也。並斃之。牀未幾事露。具獄奏聞。敕建坊旌氏。而磔無賴者於市。時乾隆十八年季秋朔也。氏死在是年春。里民走報縣尹尹驗。知非盜。顧莫得殺氏者主名。為默禱於神。會月食夜。與同官禮護畢。隱几微睡。突見一人立而語。矢貫其胸。覺異焉。適奉文派夫濬河。乃往取村戶版籍。按名覈之。至第七人曰許忠。尹心動。得非若耶。蓋許為午言。午言為馬語。矢貫胸則忠字也。諦見許兩手伏地。其一踈曲袖中。令出視。有片絮囊指。啗痕宛然。裸其體觀之。則自項及脅。脊股掌間。爪迹參錯。莫可數計。一訊吐實。始悉氏死時反覆抵拒狀。而獄定矣。傳其事者。淇令江右周君燠也。周又為樂府四卷行於世。號中州悲烈紀。

論曰。伊古婦女守貞。不為彊暴汙者。首稱召南。行露野廣兩詩。然余觀其時。江漢化行。人知重羞恥。即間有雀鼠輩。得毅然援禮義以絕之。以是歎古之為貞女者。猶易也。輒近風氣日媮。民之縱欲。狂狼彌甚。悲哉烈婦。以一孱女子。與兇徒相格於風雨晦冥之時。而乃鄰犬不聞。死鹿被束。百端抗抵。至力竭氣殫。甯受屠毒。不辱以終。可不謂難焉。按延邑近淇。淇故所稱桑間地也。烈婦處茲土。節操獨凜凜如是。則豈非

漸靡於
聖世之德化者深故堪興南國貞姬媿美哉被諸管絃以當房中雅奏宜

乙

方孝子傳

錢青選

方孝子者。姓董氏。名盛。祖雲南黑鹽井細民也。以其幼寄方姓。呼之曰方孝子云。盛祖樸誠。不知書。早失父。事母純孝。凡起居寒煖。飲食事奉。必躬親之。無少懈。母亦甚安之。非盛祖不適也。盛祖業負販。無兄弟。一妹嫁里中。常往來省視。出則呼其妹。以母屬之。妹亦能先意承志。如盛祖如是者。以為常。蓋數十年如一日焉。盛祖嘗晨出。賃行數里。有蛇當其前。驚而却。頃之。蛇乃去。復前行。里許。則蛇又在焉。盛祖懼。愀然曰。是必吾母病喚我矣。急歸。則母果病臥。方喚盛祖也。自是遂不復出。及母卒。哀毀逾常人。一日晨哭。頓絕。鄰里驚救之。始嗚咽而甦。眾咸感歎。比葬。手灑土石。馬初盛祖有妻而早亡。遂不娶。或勸之。盛祖慨然曰。娶婦以事親也。願賢者實難。脫其不賢。將戾吾母。吾能安乎。且吾常見吾里中之婦矣。操箕帚。執炊爨。作苦克家者。猶往往難之。求其與子一心。順旨承顏。疾痛疴瘵。相關者。卒未之聞也。今吾居則事事親奉。吾親出則有妹以代吾役。使吾母得安其天年。乃吾事畢矣。又奚以婦為。終不復娶。未幾亦病卒。竟無子。包學海云。

贊曰。孝子可謂終其身孺慕者矣。雖無矯矯驚俗之行。可不謂賢歟。或曰。不孝有三。無後為大。孝子以不再娶而卒無子。母乃戾于古訓歟。是又不然。孝子固愚。不知書。

者也。亦行其心之所安已耳。顧安知不娶無子之為非耶。乃其妹者。又能以其兄事母之心為心。而事其事。亦加于凡為女者一等矣。

烈婦楊氏傳

烈婦楊氏者。滇之黑鹽井人。楊顯科女孫也。生三歲。父母亡。祖父母撫而長之。年十六。字井民。何自榮。自榮貧無恆業。父子惟力作自給。氏亦辛勤左右之。居三年。無怨色。既而自榮以病癩。目漸盲且廢。至不復能人。氏亦安之。無少異也。鄰里以氏之賢而勤於力也。相與嘉歎。或稍資給之。蓋有借于氏之傭作。而氏亦獲資以濟其難。如是者數年。氏年二十有四矣。自榮憫氏窮商嫁之。氏不應。既成約。氏微聞之。奔告其祖。祖謂之曰。夫在而嫁。非訓也。然汝尚少無子女。今即自存。將何所終託乎。子老矣。恐不能恃。汝自主之。因聚泣。氏遂含涕歸。初氏之告其祖也。蓋猶冀其事之未必然。或既然而尚可回也。及聞祖言。知莫與為力。志乃定。至期。媒來促。糶氏方磨厲畢。返自鄰。望見輿。從且至。乃大呼哭曰。兒有夫也。雖殘廢。願卒守之。奈何以兒再嫁也。急出戶。躍身投于河。救者攬其裾。氏頓絕。赴激湍。值水方漲。瞬息隨流去。以死。時乾隆四十有八年。癸卯七月初二日也。獲尸於井北境之葫蘆潭。顏色不少變。

論曰。婦人多輕生。然死得其正。則生輕而死重矣。烈婦之以烈見也。蓋其遇為之孟

子云所惡有甚于死者。氏庶幾似之。可以風矣。雖格于例不得旌。詎終湮沒哉。抑又聞氏之死也。去盧二姑事方一甲子。其死之地與日月則又皆同也。宜偶然哉。余既悲其遇。嘉其志。又感其異。是以流連興歎。為書而傳之。而不能自己也。

古羅棠愛編序

黃紹統

石邑為古羅州地棠愛編者邑人沐邑侯喻公之澤誦公之詩如對甘棠也邑人愛公久誦公詩而樂和之以誌愛戴之私故曰古羅棠愛也公之詩何為而作也歲丁酉邑大旱民大饑以偏災故格於例不獲上聞公惻然為斯民憂日夜籌救荒之策自昨之冬至今之夏寢食不遑賑糶施借事事躬親城鄉遠邇區畫井井凡卹荒善政靡不舉四境帖然至是民困稍甦公益憫彫瘵哀化離引咎自責作詩見志復念諸勸事者數月之勞惠詩以謝之嗚呼公之心盡矣公之澤厚矣公之詩於是傳矣邑人誦公之詩欲名其詩而不得比之甘棠志不忘也昔召伯有棠而無詩有棠則詩不作可也蔽芾之章國人自詠之也公無棠而有詩有詩則以詩為棠可也邑人和之一蔽芾之意也或曰公之棠無乎不在也公涖石末三載政簡刑清廢墜具舉新費序而堂廡奕然葺文昌廟而學舍秩然培龍嶺土種台山木復文昌橋山川之色盎然凡吾儕觀瞻所及登臨所至無地非公棠也何獨詩余曰公之棠無地不在也以詩為棠吾知公之棠無時而不有也公為邑千萬戶而作詩邑又為千百世而傳公詩以千百世內千萬戶之人皆獲見是詩父老子弟務農力穡三年九年蓋藏充積雖有木饑水毀不為災熙熙然日歌舞於閭井桑麻之間而棠之庇遠矣邑

國朝文匯

卷二十九

七

國學扶輪社印

人題余言。因并請余與羣公所和之什。彙集成編。付之梓人。而以余言弁其簡端。

明經李樸庵墓誌銘

君姓李氏。特秀名也。論升字也。樸庵其別號也。孝莊門人所私諡也。邑增生諱王會者。考也。邑增生諱進之者。王考也。處士諱攀雲者。大王考也。儒學訓導。君所候選者也。孺人黃氏。其配也。邑學生曰安者。其嗣也。曰陳繹珍。鍾崑章。諸生葉蕃。黃友。堉。君之四子。壻也。壽六十有六。康熙癸巳六月廿七。乾隆戊戌五月廿七。君生卒之年月若日也。君幼而穎敏。早通詩書易三經。少從其伯考愚山先生學。舉子業。嘗期以國器。在諸生中數十年。文詞修潔。學識醇深。輒為學使者所知。拔置高等。然訖困於場屋。晚而以明經應補師儒之官。非其志也。雅負至性。少孤。恨無以養厥考。奉母孝謹。嘗侍疾。寢食不違左右。中帶廁。親自泔滌。與其仲同居數十年。分甘澗寡。友愛怡然。生平廉介自持。不營求。非分。終身粗衣糲食。晏如也。舍旁嘗構一室。竹窗素壁。階前雜蒔花。和授徒其中。時展卷風簷花裡下。怡然自得。非慶吊親串外。足不踰鄉闈。間與族鄰款接。溫恭謙謹。羣飲其和。若鄉曲。以事就商。手指口畫。裁決悉當。不為世俗和光之行。尤喜周人之急。聞有陳某者。鬻其女於遠客。券成歸金矣。臨歧。父女哭別甚慘。君廉知之。願捐金代贖。客轉以敗約讓君。君曰。市人子女。非販他物。比賭斯

景况堅要前約。心能忍乎。客悟領金還女而去。其隱德多類此。聞君好談理學。嘗謂
吾輩當以真知實踐為事。不以詞章見長。今綜厥所為。庶幾知道者。余司訓此土十
餘年。僅一面晤。益然有道之容。噫。亦可風已為之銘曰。

開塘之麓。林木鬱蔥。發祥有自。溯厥宗公。百世松楸不改。宜為君子之幽宮。

氣平居凝塵滿榻。琴書顛倒狼籍。鼠噴噴竄其中。檢書時若恐驚之。有避之遊。未嘗辭。置酒則醉。遇可與言者。輒醒頭。經月不梳。衣無美惡。敝不補。垢膩常滿。行市中反手入衽。撮虱擲於地。蠕蠕然。然為人白哲。眉目如畫。人未嘗見其讀書。叩之淹貫淵博。莫能測也。初先生既被放。遠近皆慕其行。多遣子弟從之。所得束脩。甘旨。潛託三弟。獻其父。時或不得通。則循牆走泣。且望見之者。莫不泣下。其枕旁為淚所漬。久而盈尺。皆殷。八年。就吏部選。京師地震。死者甚衆。先生遂不免。今禮部侍郎鄒公一桂。奔哭。斂賵甚厚。歸其喪於西華。其父乃痛而復甦。曰。嗚呼。奈何。吾有孝子。而早不悟也。所著詩雜文多亡。今存者不十篇。子佳忱。

後學張遠覽曰。余生不及見。可庭先生。然時酌酒於先生之墓。又獲拜先生之夫人於堂。不自知涕泣之何從也。余猶記三四歲時。一日夜將半。叩門聲急。既而先君子哭甚哀。家人皆哭。則先生之卒也。於是知先生與先君子。蓋兄弟交云。後時時從士大夫長者。問先生軼事。而遺文彫落。緘述無由。夫以先生之行。而所遺之酷。至於如此。何怪夫人之致疑於天也。然先生歿且三十年。而風流宛在。泯泯者。蓋不知凡幾矣。悲夫。

劉公祠墓碑

國朝文匯

卷二十九

十一

乙集

國學扶輪社印

公諱伯驥字遇伯河間貢生為人明慈好禮而有氣以崇禎十一年為西華縣知縣是時河南盜方熾民窮且餓而劫奪無甯日公內推德惠以撫難民外嚴守備以禦悍寇夜親持刁斗坐城樓上督守陴者至忘食左右奉之曰民困且死吾食不下也縣人皆感奮以死自誓賊屢攻不利輒引去不敢窺西華十四年正月河南府陷李自成殺其帥自立為闖王并具眾以劫汴以東九月屠項城高水越西華屠扶溝十二月陷洧川許州長葛鄆陵皆逼近西華乃去攻開封公聞即遣夫人公子奉太夫人歸河間縣人皆泣曰公不歸矣明年正月襄城陷知縣曹思正死之遂攻西華公帶雙鞬握大刀登陴固守有勸降者立斬以殉賊望見怒驅其下為十覆迭攻之數日援不至城遂陷公乃釋胄易朝服內印綬於懷北向望闕拜並遙拜太夫人自投井中死縣人葬于東門之外公子福清來迎喪縣人號哭不許至我朝康熙初去公死時三十年而福清為鹿邑知縣有賢聲西華人曰我公之子也相率而省者不絕於道祠成于康熙八年舊有碑公之始末未詳也余故考述其事揭諸道左俾後人屬耳目焉時乾隆二十年十一月長至日司具工者縣尉李君大成君亦河間人

銘曰

天以劉公賜我敵邑不先不後值事方蹙乃衣乃粥乃浚乃築既惠既嚴斯歌斯祀

狼嗥鴟嘯。其來飄忽。外援不至。內計何屬。北風肅肅。設葦冥冥。流者人血。哭者鬼聲。公髮上冲。公氣上騰。刀迅如霆。矢疾如蠅。擊鼓其鏜。百雉已傾。脫我戎服。衣我朝衣。冽彼寒泉。臣之所歸。皇天后土。二祖列宗。寄臣此城。臣敢每生。臣力已竭。皇照臣誠。狂賊未殲。臣目不瞑。縣人輿尸。具哀轟轟。公子來迎。萬人是爭。公仁我人。我親公境。奔走如雲。作廟以禋。生為國士。死作國殤。青松白楊。忠魄是禱。樵採是禁。俎豆是將。神風靈雨。芳馥滿堂。其降洋洋。袞衣繡裳。豈伊異人。前令此邦。

李彥平墓誌銘

嗚呼。彥平竟天。彥平姓李氏。諱原。余字之曰彥平。太學生恩齡之子也。生三年而母程夫人歿。其繼母張夫人。余之從妹也。既於彥平慈。而彥平遂以孝聞。年十八。遭父喪。時方以危疾昏不知人。後病稍蘇。杖而起。哀慟幾於死者數。喪繼母。毀又甚。於是遂多病。顧好讀書。而勤於善。弟篤慶。張出也。彥平友愛無不至。篤於朋友。久而益新。先是彥平從金簡秘周恆山丁敏吉三君學。三君皆稱之。又學於余之門人王耕奮。耕奮嘗謂余曰。原也。姿厚而心沈。是不易得。夫子幸有以教之。則其成也可必。今年春。耕奮之京。彥平遂委其家事於篤慶。而來從余。其意拳拳。惟恐不得當。蓋其所欲得於余者甚矣。而余顧愧其無所裨於彥平也。乃一病百餘日。遂至於殤。時為乾隆

四十四年十月五日辛卯得年三十有一娶白氏贈文林郎賜功女子二線緒即於其年十一月四日甲申葬於其父墓之左篤慶服哀來謁曰吾兄之歿同學二三子哭無不失聲相與謀曰是惟請夫子銘其墓彥平雖死不死嗚呼何忍不銘昔者彥平請銘其父墓猶如昨日而遽以銘彥平安得不有餘悲銘曰
死已數既不死宜可淑秋風暴促春旭我為銘聊當哭

胡望溪墓誌銘

嗚呼望溪歿而葬其孤來稽顙請銘其墓曰亡父臨歿囑請銘于夫子且曰昔者葬吾祖夫子為銘今我門弟子也汝並不必為狀知弟莫如師夫子必許我嗚呼望溪姓胡氏諱景濂望溪字也祖崇修所稱偉喬先生即余銘其墓者子光無無子以從子光勳之子景濂為之後即望溪也望溪為人小心謹畏少無子弟之過長慕敦篤之行自期甚奮而力恒退然若不勝顧篤于學而尤好余之所為文余所為文輒散去不自收拾而望溪每遇一篇輒錄而存之其按羅校讐不遺餘力余文之足存與否不必論而實賴望溪而存嗚呼余之所望于望溪者安在而望溪懇懇于余者即是可感也望溪生於乾隆三年十月丙戌卒於嘉慶元年九月戊申得年五十有九以縣學生終娶張氏子二應嚴娶于凌應恭娶于王女子歸王九寬明年四月丙子

葬望溪于其祖墓之左。嗚呼。余昔者銘其祖墓。今銘望溪。銘人墓三世矣。以此思余
之于世也。不其亦久矣乎。乃為銘曰。

嗚呼望溪。是為墓之銘。墓中人兮如生。我銘斯徵。

江孝貞女頌 并序 代金司勳

胡廣善

昔松江汪文學洪度作女史徵柳閻貞淑志錄畧備其以女子未嫁而守死成貞義者邑有三人焉曰吳淑姬曰蔣女曰程女淑姬吾鎮人少字潭渡黃夢柏仲子是遊學客死淑姬往弔具歸喪服斬如禮哭盡哀既事入內寢一夕自經死蔣村人其所字者為槐塘程繼濂繼濂從其父賈長涉積二十餘年斷絕音問父母數欲改字之蔣固不可鬱伊成病死程繼濂之族也而字蔣氏蔣氏家塌田死問至程赴喪弔哭歸輒自經用母救不得死獨居鍵樓戶緘紉自食幾三十年乃死金子曰以余徵之孝貞江氏女猶信江氏女者邑人其父嘉桂故與楊某姻連楊有子嗣立而慈嘉桂喜字之已而嗣立死赴告及嘉桂嘉桂夙奇女志趣猶豫未忍發然卒莫能秘也女聞則大恟欲死之嘉桂泣曰若無然雖然何埤于嗣立嗣立之父母在也不可往若家終婦事乎女乃泣而往見祖姑則祖姑老矣見其姑則姑病且不知人臨嗣立之喪則塊然孑然一慟幾絕曰已矣滋欲死之甚楊父泣曰若無然雖然何埤于嗣立嗣立之兄弟在也不可冀立孤終若義乎女乃泣而止比死嗣立之兄弟各以其子為之子蓋女自之楊氏十有九年所以事姑者一以艱貞濟其孝其姑始猶暴遇之久而習安之又久而惘然覺悟悽然悲泣曰若吾婦耶婦如是吾不復苦思亡

子矣。是故嗣立之兄弟各以其子為之子者。義感致然也。金子曰。孝貞事與吳程二女頗相類。雖死生之際。遭值各殊。然皆能以義自完。其歸一也。江之父母。則賢于蔣氏遠矣。乃列序而頌之。無令史微專美于前。載頌曰。

吳將慷慨。程女從容。之死靡慙。志義則同。維江之媛。前烈比蹤。既貞既孝。聳悅斯宗。匪惟聳悅。乃古之英。閨門夷秘。巾幗曰嬰。用專存孤。伯道復生。於世萬萬。不隕清聲。

書胡孝子事

孝子與余為同姓。名如楷。孔堂其字。厥考例監君肖巖先生。諱對揚。娶于畢。而生孝子。例監君之考曰正履。康熙庚子科舉人。卒官山西高平知縣。文辭瓌瑋。傾動東南。與邑中葉孝廉嘉桂齊名。學者所稱。坦又先生是也。例監君繼承家學。思益迪前光。而性故豪蕩不羈。自為郡文學。屢赴江甯鄉舉。而屢蹟。則北走京師。以鄉學生援例入國子監。就順天試。復不售。既散。屢科名。委蛻家室。又頗聞岷峨之勝。遊興勃生。即次西行。展轉入蜀。雖一紙家書。夷然不屑也。孝子方韶齒。固已知其父在客。請往。壽求而未得命于其母。于是歲在鵝首。例監君之出也。凡十有二載。而孝子之生。亦十有七齡矣。乃心思父逾亟。夙莫治行。不可復已。母亦撤簪珥為資。是用辭家西遊。逝流漢荆。微聞其父之在蜀也。則託故友還書以白其母。而入蜀。赴重慶。詣成都。跋雅

州出箭鏞。連龍安。踰棧道。徑忠州。度保窰。走劍州。趣劔門。往還幾萬。有餘里。皆不還。孝子方倉皇無措。而遙望道旁柏林中。似有紺宇者。然滄著行。痲姑往一憩云。至則真武宮也。守宮老僧雲參者。見孝子乍問曰。客非江南人乎。曰然。曰非胡姓乎。孝子方愕曰。然。師烏從知之。雲參復曰。然則客非肖巖居士郎君乎。孝子大驚泣下曰。然。然今吾父安在。曰在。請孝子入。孝子隨雲參入。雲參故延孝子環視其室外內。指材木曰。此居士自備終制也。指土爐曰。此居士自為生壙也。壙上碑石。則保甯張太守所為。居士題志者也。居士不復歸矣。郎君遠復良苦。如之何。如之何。孝子泣曰。楷求見父。惟師憐而導之。他非所知也。雲參乃徐曰。居士入幕中江縣廨。去此六百里。相見且夕耳。幸勿苦。請止宿而後行。翼日。孝子辭雲參。行抵中江。例監君故無歸志。而又重難其子之遠迹也。方攜持慰諭間。孝子更出緘書十數。次第以進。皆例監君親舊所貽者。子中張文學修能書。懇勸尤摯。例監君視之蹙然。孝子且長跪具側。泣涕求歸。而中江嘉侯感孝子之誠。復為之憇思不已。例監君乃稍稍心動。孝子遂奉以南歸云。當孝子之次重慶也。資用絕矣。進退維谷。適閩人賴君德安。行賈蜀中。與同逆旅。憐其孝。贈之白金十兩。孝子藉以供屏履。往復徧兩蜀。竟得父耗。比發。自中江嘉侯率諸幕僚餞之。江游。瀕登舟。例監君失足溺于江。川流駛激。孝子忍不忍。赴

水從之。適舟舵牽挽例監君衣得不濕。而孝子湛浮湍流。從舵旁得父。扶抱大呼。而中江亦趣使役從往拯。竟出其父子于水。以歸無恙。皆以為孝感所致也。既歸。越八載。例監君乃以天年終。而其母畢。今尚健在。履善曰。先子昔受經于高平。與例監君兄弟為厚。暨孝子就傅。則與余後先同出魯齋鄭先生之門。族好世教。高平再用文學蜚聲。而孝子以篤行著。既雕既琢。復歸于樸。亢宗續古。孝子其勛之矣。

方君晞原權厝誌

吾友方君晞原。以乾隆五十四年七月廿有七日辛亥。疾卒于漢皋邸舍。越十月四日丙辰。輿觀東還。權厝于縣北陽峯里之原。其孤起泰等泣而請誌于余。嗚呼。吾忍誌吾晞原也。夫自余之交于晞原四十年所矣。曩者吾師朴山方先生來自淳安。主紫陽書院講席。余等執經門下。與晞原俱。于是乎始相識。先生旋返。彼此分攜。間一遇。從然歲時。率不數數。洎甲申乙酉之間。余在臺南。而晞原與汪子稚川。吳子惠川。及其弟箕浦。下帷于辛橋。乃獲晨夕焉。其後余館西干長慶寺。授徒之暇。晞原輒邀至其家。不則旬日過余。釐躬行之得失。證學詣之醇疵。往復流連。繼以規勸。雖臭味不啻也。先是晞原從張孝廉約林遊。迄紫陽。以往轉益多師。于婺源則江徵君慎修。于桐城則劉學博海峯。授受淵源。醇而不雜。加篤志嗜古。雖塵務旁午。酬應棼如。恆

手書一卷。炳燭呬嗒。比漏下四十刻始息。如是者三十年。其為學自漢注唐疏。以洎宋五子之書。皆博涉徧觀。擇其善者。而不泥于一家。不詖于一說。嘗語余。孔門而後。言絕義乖。儒流滅裂。然人道所以不終為鬼魅者。程朱之力也。吾儕博行實踐。師尊之不暇。而敢妄有瑕疵乎。又竊悼文章之敝。與余屈指數十年來。師亡道喪。傳述無人。不獨紫陽同門。零落殆盡。雖近歲辛橋二川。亦奄忽物化。宿草墓門。云誰興贊。而後生少年。苦無趣嚮。故所與接遇。其有志自樹。不詖隨流俗者。必誘進而獎成之。諄諄懇懇。一如其親子弟然。所著道古齋初刻。其風律直埒安溪。而自然過之。然晞原未嘗以自是。又時時促余。與共商榷。取前明定待。在閩諸選。擇其尤雅。綴緝成書。如文粹文鑑之例。畧存經義一綫。以待後之人。嗚呼。此晞原公誠之心。違乎疇類者也。晞原家世業漢皋。自其尊府藩理公時。經紀得所。有大以盈。俾晞原里居。為之繕祠宇。葺社壇。治嶺阪。平山蹊。且卜宅以妥其高尊。累世之喪未葬者。又以其餘波及族。媼久故。時其緩急。人得其意。聞見背負。亦度外置之。蓋其望財而重義也如此。比歲以來。晞原自以年老子幼。鞭長弗及。屢欲取漢皋之業。休而息之。未果也。去年春。始成行。余往送諸其家。每更闌酒罷。并坐深談。委曲纏綿。未忍分割。余固疑此。覿別耳。何暇顧若是。雖晞原亦不自知其何以至是也。嗚呼。孰謂晞原之一去而不復返耶。

晞原將為起秦娶婦。有吉日矣。而晞原死。赴至。家人議從俗借吉。起秦泣曰。烏有執親之喪而沐浴佩玉者乎。聞之者皆泣。余亦泣而撫之曰。子若是而翁為不死矣。傳云。非此其身。在其子孫。余私度天之所以大晞原之後者。必將有在。而獨惜余之老而未及見其成也。晞原諱矩。靈山人。由恩貢生需次學博。學者稱為以齋先生。春秋六十有一。夫人豐南吳氏。如夫人汪江張氏。丈夫子二人。起秦也。長。其弟曰起謙。世系具晞原所為。藩理公行述中。不備載。載其所學之醇。與其志之公且溥。而當世之不復有斯人為可哀也。

原命

張望

古之言命者。合天與人。先理而後氣。今之言命者。離人於天。任氣而遺理。嗚呼。何其言之悖而不可訓也。夫人。事有順逆。天命有治亂。理與氣不同。立治與亂。故異命。自生民來。幾千萬歲矣。蔚之為事功。顯之為德行。古今益以日遠。天地久而長存者。天命常始。人事常因。人事常主。天命常輔。然而命不可以一日不治。則理不可以一日或屈。氣不可以一日使伸。何以明其然也。夫理猶君也。氣猶臣也。君有聖庸。臣有忠構。理得其衡。則氣效順。氣效順。則氣輔其理。而天命治。理失其衡。則氣侵權。氣侵權。則理役於氣。而天命亂。是故有治命。有亂命。有命將亂。而復治者。有命將亂。而人治之者。有命亂。而人治之者。有命亂。而不可復治者。治命者何。堯舜湯武之惠迪吉。桀紂幽厲之從逆凶。是也。亂命者何。羿得以篡夏。秦得以代周。咸陽之士。無子遺。長平之屍。數十萬。是也。命將亂。而復治者何。孔子畏於匡。圍於陳。蔡。是也。命將亂。而人治之者何。熒廩。可以下。謨。蓋。可以出。微服。可以遠。是也。命亂。而人治之者何。少康之復夏。光武之興漢。是也。命亂。而不可復治者何。跖。修。而回天。牛。疾。而鯉亡。孔。窮。於魯。孟。老。於鄒。是也。夫。前。古。天。人。之。際。如。此。其。大。較。也。故。曰。人。事。有。順。逆。天。命。有。治。亂。理。與。氣。不。同。立。治。與。亂。故。異。命。吾。以。是。數。聖。人。之。立。身。也。聖。人。之。事。天。也。奉。天。之。治。遠。天。

之亂不奉天之亂遠天之治奉天之治而得福為恆遠天之亂而得福亦為恆而有時皆喪焉聖人不懼奉天之亂而得禍為恆遠天之治而得禍亦為恆而有時皆喪焉聖人不為故孔子曰不知命無以為君子也子思子曰君子居易以俟命小人行險以徼幸孟子曰殀壽不貳修身以俟之所以立命也又曰知命者不立乎巖牆之下又曰口之於味也目之於色也耳之於聲也鼻之於臭也四肢之於安佚也性也有命焉君子不謂性也仁之於父子也義之於君臣也禮之於賓主也智之於賢者也聖人之於天隨也命也有性焉君子不謂命也然則自內者盡人以符於天自外者進天而退乎人夫乃真知天命矣今也不然庸庸以自好沓沓以為事愚者昏弱而不進黠者貪汙以自賊雖聞其愚懲其黠不憚告之以人理彼且曰有命焉有命焉則離人於天者矣任氣而遺理者矣離人於天曾有事乎哉任氣而遺理不謂之亂命可乎哉惟昔聖人知生死之故也審然莫知生之時莫知死之日及乎事已至而效故違然後歸之於天而已不與非徒釋衆疑以堅為善而已抑誠氣之加乎其理者無可如何耳未有忽其事而任其命者也有入於此苟焉怠其事而棄其生不能衣食而凍餓且死豈命乎如曰命也前乎死者將責其惰與抑逆料其死而姑不責與設早自奮以有衣食而不凍且餓將憫其勤與抑逆料其不死而不用吾憫與

於多行不義以取辜改而免者何以異是嗚呼其可謂不思也已其亦異於聖人也
已其真不知命也已

茂才

天以降才山川以鍾才學以養才或才而聖或才而賢才而曰茂者上也才而止者
次也才而善者下也夫才而善書契以來有之矣天也山川也學也有所歸也遊哉
猶有却今將鑄說以錮之人肖天地其生也造形嗑氣於其父母始生腎腎有兩左
水法天之一右火法地之二天地人無水火不能成乎三才腎以水為體以火為用
其藏精與志其主骨精者腎之真氣也易曰精氣為物言氣氣化生也水之流行無
遠弗至志之象也骨者水之凝也是故饑之不朽渴之不竭寒之不栗暑之不煩霜
之不賴霧之不散風之不換蘭之不劫血之不辛絕高不顛險若坦夷其內大亮其
應無窮若是者孰為之精為之矣是故其位置也自高其待己也甚厚其望世也實
深以悲乎天命以閔乎人窮母苟飽母營居家必孝國必忠如射者之中招不中弗
已如御者之致遠不致弗歇若是者孰為之志為之矣是故擔君父之重當四海之
變定傾側之危冒嫌疑之際持鎮靜之操朝廷著其節天下服其勇若是者孰為之
骨為之矣夫天地之水火在人身用之經數十年而飲食焉男女焉六淫焉七情焉

曲禮曰三十壯四十強五十艾六十耄七十老八十九十耄素問曰四十而衰衰者腎之衰也水衰則濫火衰則焚其正委權其邪當事於是精衰則狂感而喜忘矣志衰則恍惚以惛曰矣骨衰則軟散無堅直矣人身也者自無而之有也三月而孩不能精也不能志也不能骨也始乎腎者卒乎腎此亦消氣歸根自有而無之驗也天之所降山川之所鍾及其衰也天與山川不能扶世之論才者原始要終雖或憾其不茂而至於萎方且返其父母之天而冥芒莫之省也夫惟聖人者學以養之聖人之才與年加茂聖人不能離乎飲食男女六淫七情學焉而節之憫之乎詩書之書游之乎仁義之府以葆其精以磨其志以申其骨以扶其衰有所不足不敢不勉終其身焉而已矣故其事業功德老而煥然愈彰甚矣夫學者變化之神能也

鄉治

天下之治始乎縣縣之治本乎令然而縣令成教化一風俗以聞於宰相天子非其特立而孤行也下有丞又有尉亦非丞與尉之輔而足也此其故為縣令者殆未有以明焉朝廷垂意為縣矣勤勤於必得其人得人矣又慮以一邑之大民之衆上與下不相屬政令無與行威惠無與徧雖謹且廉而其政不舉於是里有長鄉有約族有正擇其賢而才者授之然後縣令之耳目股肱備也縣令勤於上約與正與長奉

於下。政令有與行矣。感患有與徧矣。族之人有一善。則其正勸之一族矣。里之人有一善。則其長勸之一里矣。鄉之人有一善。則其約勸之一鄉矣。有一不善。則斥之一族矣。斥之一里矣。斥之一鄉矣。既已如此。縣令於政理之暇。又時召見此三人者。而問百姓疾苦。人情嚮背。而以攷吾政優優。怡怡。勞來而益。委重之以樂乎其心。而警其怠。宣上之德意於民。民皆曰。上之愛民如此也。上之期我以君子善人如此也。吾日見鄉里風俗之美也。一鄉如此。他鄉可知也。一縣如此。他縣可知也。豈非鄉治而國治。國治而天下治乎。如或縣令不能奉承朝廷之意。以求化民成俗。至以苟且疏闊為事。族正既授以虛名。而不問鄉約。殆非所謂約也。里長殆非所謂長也。其小者理戶口。治館驛。大者剽掠殺人。必以告。一切奔走奴隸之而已。一不當則羣卒叫號於其家。而怒詈辱之於廷矣。而率其民以奉乎令者。固不責焉。況不選擇而使使之。又不以禮。則夫自愛者。固不肯為。為者類鄉里無賴之人耳。借以生事。容奸賈禍於民。而陰享其利。且彼亦窺上之以無恥待也。眾之所謂下流而居之。雖欲潔清。不汙不得也。遂盡從而棄之。上之人又孰從而信之。不惟上之人不信而已。即以己之不善而教人善。以己之惡而謂人惡。平居說說。其誰信而服之乎。不信不服。而鄉里之患不可言矣。訟獄盈庭。簿書矻矻。縣令日昃而不暇食焉。極於囹圄。充塞積衣半道。

而不知誰之為之也。其亦疏而失其本哉。論鄉治。

知人難

知人難。何謂知人難。同其是而喜者情也。不同其是而佛者情也。有不同其是而無佛者。甯有同其是而不喜者。今有兩人於此。其一人助我者也。同其是也。其一人撓我者也。不同其是也。助我者大都君子也。撓我者大都小人也。又有兩人於此。其一人撓我者也。不同其是也。其一人助我者也。同其是也。撓我者大都君子也。助我者大都小人也。是何也。彼之助我者。有利於事而已。彼之撓我者。勿便於己而已。此之撓我者。不利於事而已。此之助我者。求便於己而已。學成行專。名字大起。宰相知之。天子用之。顯要繫天下之望。朝廷不能有君子無小人。不能使君子當事而小人無為。於是乎同聲相應。同類相從。而助之者至矣。於是乎異臭相反。異色相鄙。而撓之者至矣。此其固然。然而吾之心一耳。天下萬有也。人之賢不肖。事之成敗利鈍。知之而豈盡無遺。其從而撓之者。開吾之智也。其因而助之者。蔽吾之明也。夫謂因而助之而蔽吾之明者何也。非其心之果是之。所以然者。求便於己而已。知其賢不肖矣。與其成敗利鈍矣。曹輩尚或沓默未同其是。而此一人已依依與歎同其是矣。出於非望矣。此豈其情哉。夫賢者快心快腹。固自信固不疑人。方且假借地望。設吾道之

援究大事如此贊王室如此而孰知是人之非其情也。養爪銳為搏擊之資。洗垢求瑕。較吾道路。異時以敗大名。亦悔之矣。其小者點名。蘧色。冒不知人之誦。其大者妄生羽毛。禍人國家。古今亦何可支哉。故曰知人難。

堅垂問

或曰：秦符堅不殺慕容垂。以垂之貳於堅。孰為是非與。則皆是與。抑皆非與。曰：堅之不殺垂。說者稱其有人君之度也。垂之貳於堅。說者原其有復燕之志也。則皆是也。而吾以為皆非也。初垂為太傅。評所不容。奔秦。先是秦王堅聞恪卒。陰有圖燕之志。憚垂不敢發。及聞垂至。大喜。郊迎。執其手曰：天生賢傑。必相與共成大功。他日還鄉本邦。世封幽州。不亦美乎。以為冠軍將軍。明年秦滅燕。堅之寇晉也。大敗於肥水。以千餘騎馳赴。垂軍三萬獨全。或勸垂害堅。垂不從。曰：吾昔為太傅。所不容。置身無所。秦王以國士遇我。後復為王猛所賣。秦王獨能明之。此恩何可忘也。若氏運必窮。吾當懷集關東。以復先業耳。悉以兵授堅。行至灑池。說言於堅曰：北鄙聞王師不利。輒相煽動。臣請奉詔書以鎮慰之。於是堅歸長安。垂趨安陽。會翟斌叛。堅驛書使垂討之。垂方修好於堅。子長樂公丕館之鄴西。已而相疑。而不且欲圖之。垂自鄴行至安陽。覺其謀。即叛秦與斌合。抵洛陽。稱尊號。復東如石門濟河。長驅向鄴。石越討垂敗。

沒丕遣姜讓譙之。垂曰：孤受主上不世之恩，故欲安全長樂公，使赴京師，然後修復舊業。於是遂上秦王堅表，圖鄴，自春徂秋，不拔，怒解而去。縱丕使西歸也。主燕祀者，垂之兄子暉，本邦固在也。滅燕而後，即何不以幽州相處？堅自謂收攬英雄，以清四海，而不知彼即特起細微，猶尚思南面而王。今垂以國易身，東望鄴墟，先人之宗廟，悠悠何時，能無哀嘯乎？條籠之間者，一聞肥水風，姦凌霄而去，雖其富貴壽養，羣臣致隙，始終而保全之，而滅國之怨，毒深矣。堅在幸無事，一旦捐賓客而不立朝，養鷹之後，變為養虎，迨至澠池，而歎有蘇張之事，猶為未矣。故曰：堅非也。於是君子為垂計，既以為秦冠軍將軍，而伏事於人矣，其來則自燕也。父銳之所創業也，秦而加兵於燕，燕則必亡。垂於此時，號涕為燕請命，身死妻子為僇，而無怨也。垂能存亡燕，秦能亡燕，而垂又能使秦不亡燕，懷其小存，忍其大喪，以俟吾他日之乘間而自取之。故其縱史於加晉之兵矣。垂之攻鄴也，為復燕也，似也。淮南侍衛乘輿，淮北悉以兵授安全長樂公，使赴京師，是其本心。及解鄴圍，開丕西歸之路，以謝秦王，昔之懸其報復，亦畧相當。然而君父一也，復燕為銳之孝子，不貳為堅之忠臣。國家方履禍，豈見利而不顧其君？故綱目謂之叛，是其託於秦以傳虎翼，以為異時裂地而王之本。淮南侍衛乘輿，淮北悉授兵，安全長樂公赴京師，解鄴圍，開其歸路，庶乎恭順。

者皆不足以贖之矣。向使秦舉兵攻燕，燕之將亡，垂計窮逃，久之，據有形使之地，聯落燕趙之衆，雷疾電飛，收還棄失，入鄴告廟，以示成功，甯不飄然偉丈夫哉！惜也。故曰垂非也。故曰堅垂皆非也。

送魏梅山歸龍津序

梧溪先生既亡之十有二年。梅山魏鳳闕，至自龍津，過棠城子。談者屢曰：棠城子和唐風，梅山為之序，已乃從棠城子聞予入城，訪予於學舍。童子炙菽煎茶，以奉梅山。未進，梅山慨然曰：羈者遭梧溪於斯土，遽倖風好，相與恣其意於山水文章間。凡六閱月，今我來則梧溪物故久矣，因泣下。遽起立戶外，頃之童子挑燈進茶，梅山索予文展卷一過，必中於其短，相得益譎甚。童子徐引退，不知也。夜沈沈然，益辨難不絕響。始梅山客棠城子，予在洪州，及是相見之日淺，而梅山則且歸矣。嗟夫！予其已於梅山乎？傾十三年以來者，送之梧溪之西歸也。飲故人於汲翠樓上，當是時，微雨夜寒，松聲在戶，梧溪論天下事，眉宇軒軒然，已而酒酣客散，竊見送梅山序於几端，詫其為人。梧溪指而謂曰：吾徒之選也。明年梧溪死，家藏書與所著詩，散亡盡，檢遺文至梅山序，想樓中對語之夜，不禁失聲哭。是後耳目所際，多親故傷心之事。往往一念梧溪，則梅山與偕至，抑又恨不見梅山，而梅山固不可猝見，思之十餘年，而一

且至此殆天也。梅山之為人，梧溪固已序之，而梧溪之所不得，則益進乎序之云。學該而文茂，語直而氣和，獨予貧不能主梅山，而梅山亦以故不得留，其可惜哉！於其行也，益思梧溪云。

盧大夫傳

盧公諱遠，字瑞芝，破石坪人。南唐尚書侑之裔。少貧薄不自憚，游寓江沔。年五十一，賃備糧道姚公署。陸陸無與為名姓。康熙十三年，叛將楊富餘黨稱白頭兵為亂，大兵駐省城，屬辦軍事。有功。明年，募造戰船無應者，公列較中前身曰：某能。節帥由是奇之。於是洪東西州郡多陷，巡道李公副將吳公竝才公爭致麾下。十五年，用公勦奉新流寇，擒之，旋從克復上高、建昌、安義、靖安、餘干、鄱陽六縣，乘勝蹙賊於瑞州。是役也，公功為盛，授千戶長。是時洪城艮山民塗而載者數千人，悉倚公為命。還止其疆。十六年，總督董公有撫州之戰，授明威將軍，尋攻江潁山，勦朱天錫，復銅鼓營。遷昭武將軍。十七年春，徇吉安、贛州，大破賊，秋與廣信賊對壘，鏖戰凡五晝夜，克之。進取楊一豹，搗其巢，賊盡。江西平。公還省下，有故旅往來客，候公曰：方貧傭時，不知君之至此也。脫冠見著，覽整處盡禿。然公年已老，而精力不衰。時時為氣如壯丈夫行者，黔滇告警，命總督某往討之。檄公偕。又慷慨騰馬脊行矣。己未春，大軍赴

雲南五月攻烟溪身先諸將夥斬獲入簡親王部勦紫陽河賊連大捷救出被寇四千四百餘人於是破黃茅嶺克靖州復鎮遠衛城駐平越府討馬竇防鴨池河謀渡無舟乃命士卒編竹為筏乘風直進賊望見膽落不戰走矣追至黔西而還雲貴初定而馬竇部方寇四川公語督帥往偵得其虛實乃捲甲而趨之拔其營隨畧隘口獲輜重器仗無算賊尋滅督帥上公功最乃班師壬戌遷江西官拜左都督仍帶軍功二等管湖廣施州營遊擊事越五年晉階榮祿大夫贈曾祖祖父如公階年七十致仕歸卒年八十一葬新建軍家山公起行伍老乃得官出入輒轉於矢石間者近十年諸凡大小關未嘗敗北嘔蓋其人豪哉

追葬鷺渚阡

順治元年我師大破李自成於山海關自成棄京師西走明年夏餘黨寇南昌之武甯鄉民余公紹高禦之於牛頭峽賊死先是英王僞賊至九江後營總兵金聲桓請收江省自效王乃北旋已賊黨數千人從間道犯縣聲桓未入南昌而都御史曠昭懷鼠首仰郡息不得城陷縣官逃賊然公廩剽斬而去公本以匹夫雄猛有膽畧為鄉勇倡初偵賊旦夕至號於衆曰此覆祖宗三百年社稷國破君崩亡命走此再來披猖願與公等甘心此賊一口應曰諾遂帥土圍壁牛頭峽峽甚隘斷木為柵死守

賊不得進。首縣城下之。既而出。不意反攻牛頭峽。躍關而入。公與衆人殊死戰。不克。遂遇害。是役也。死者相枕藉。賊焚掠聚餉村里為墟。由公而傳四世。而鳴珂始為諸生。閔公捐軀寇虐。亡骸無所。歲時寒食。曾不得子孫一杯飯。漉冢決。查沓縣縣。游魂罔寄。必有飢愁。寃憤而不克信者。於是公之死百三十年。為乾隆三十九年二月庚子。乃始制脰。范蒲為身。為位招魂。而葬之鷺渚。壙於辛丑。墳於壬寅。碑於汗。以振厥烈。張望序其由。而文以弔之。其文曰。

嗟乎斯民。不幸當大亂之世。父不能保其子。夫不能保其妻。兄不能保其弟。一旦皆裂髮張奮臂大詔。以築仇人之骨而死者。何可勝道。方其大盜撞唐四出。朝廷徵所在。雄兵貫將。壘方面以制其死命。而殘肢無主之餘。曳戈潰散。流亡邊鄙。鄉里無賴。桀黠積延頸有隙。陸梁盜唯以快其氣。又應乎茅屋之下。於是巖邑大都。當天下之要害。固已焦朽糜爛而無遺。至於荒谷冷縣。舉豪傑所不爭。民生無外事。百年老死。不見兵革之憂。破敗立至。草薶而禽獮之切。切然孤兒寡婦之痛。徧百姓家矣。武甯僻在巖穴。當公之際。丁國家傾覆。預蒙四海之大難。及

聖人出而天下平。山中之民。安安而臥。由由而起。木石之與居。牛羊麋鹿之與遊。無由為壯門。夙戒雞啼狗吠之警。蓋已數世而百年。子若孫庇其蔭澤。而當日之駢首

雖褊僅若蚍蜉蚽子之性命。真者獲何人哉。予方欲詳二年之事。與公之生平。而歷世既遠。老成哀謝。而不可得。及覽縣志。而知與公同死事。有公之族尊大其人而已。嗚呼。其他姓名不可攷者。又不知幾千百尊大也。公憤不顧身。以殉一日之急。以此而死。亦以此而晦。百餘歲之後也。又卒以此發其光。而傳。夫豈非千載之遇耶。而吾以徵賢烈之不可無後。而又嘆詩禮之澤之不可一日不灌於天下也久矣。

遊柯山記

吳高增

汎舟鑑湖之曲。弭棹容與。迤邐西南行。青嶽碧波。自相映發。漫流洄瀉。環山淪漣。鱗鱗清激。菰蘆蒲葦。紛披水滄。舟人曰。此柯水也。維纜登陸。攀蘿捫葛而上。苔磴峻嶮。竹生巖竇間。琅玕峻拔。益奇而堅。大抵柯山結體。崢嶸骨立。雖無玲瓏洞壑。神劍鬼鑿之奇。而造物者之鎔冶。于翠螺參差秀矗中。別置一格。青鞋布襪。經歷陞坳。滿眼初平之羊。叱之不起。或蹲或偃。令人陟翫忘疲。灌莽中覓覽。勝亭故址。惟苔痕斑斑。類古梅作花。白照幽谷。或作青翠色。點綴荒寒。殊可人意。取徑而東。嵯峨石佛。準諸丈六金身。高且十倍。像教之說。本欲使震旦海衆。咸生信心。而彼徒詭論。務眩奇觀。其實化人無迹。初不須此。此妙相雖。峩崑雲表。視南明大佛。已縮小須彌矣。東巖石牀。皴法峭異。披麻劈斧。層疊軒豁。恨不得米襄陽。滴蟾蜍水。磨隴糜一斗。潑寫之。循故道回屐。忽松颺。謾譚潮簸。林角懸清怒捲。似有留客意。下上嵌峯。思凍雨飛灑。一洗叢碧。雲收天露。崖根皆見。當有清光可挹。或霜空晚晴。鏤琢冰雪。刻轆稜竅。曠景初射。寒霧浮浮。必露青巖冷翠。惜乎不得如釣父樵叟之蕭閒。坐臥溪山。囊括其勝也。

崇樾鮑氏宣忠堂支譜序

曹文植

譜牒之義尚矣。先王大宗小宗之制。至秦有天下。而凌彝不講。由是世遠則弊渙。齒繁則弊疏。不渙不疏。則又病乎龐雜。而無紀近代以來。藉以奠世繫。序昭穆。別嫌疑。定親疏。胥於譜。是賴宗譜水所匯。而支譜其衆流也。鮑氏為新安望族。其宗譜修明。閱有年矣。今崇樾官園學堅兩君。謂邇者之未有紀也。支譜不立。將訂宗譜。曷據焉。於是別立一帙。遵舊譜例。以肇基崇樾者為始祖。而就其本支。乃條分而縷析焉。支各一譜。則萬人猶一身也。子孫繩繩。循例以續。則百代如一世也。其良法美意。吾固揄揚之。不能以已。而竊於鮑氏更有遐契也。歷觀古昔卿大夫。慮無不翼子孫計長久。以庶幾乎勿替也。然或一傳而其澤斬矣。或數傳而其族微矣。豈氣數之有盛衰歟。抑其根本之謀之未盡善歟。君子知卜世之道。不在勢之榮落。而係乎德之大小。不在家之肥瘠。而根其教之淺深。於是垂世作則。示之以仁義中正之途。緼之以忠孝節廉之事。而其子若孫。亦能奉先人之彝訓。而聰聽之。而恪守之。兢兢焉。思有以迪前光。而型後嗣。嗚呼。循斯道也。雖百世不敝可也。有明中葉。鮑思庵先生。官少司馬。致仕後。額私第曰宣忠。雖採制詰語。其所以教子孫者甚篤。今支譜即以命名。可見前以此顯。後以此承。家聲罔墜。豈顧問哉。又考崇樾為慈孝里。蓋其先有父子遇

寇相爭以死而卒相全者其務德殆家法使然歟今梓是譜者為吾友宜園宜園於城南書院捐巨貲為膏火其待疏遜者如此其篤宗盟可知也以吾所交者如此其族之懋厥德者諒亦猶是也是即其族寒微吾且卜其寢昌寢熾而况子姪椒行簪纓燕喜乎哉雖文譜也而他族之宗譜不是過矣嗚呼鮑氏之興甯有父乎

非園自記

屏余室若山也曰茅山庚寅春余構小園於此高高下下因山勢而為之架木無多成功淺易娛老焉已矣故顏曰非園既乃仰而登俯而眺風景依然若有所觸則余五十三前之夢境也余為童子時夢遊於此山山有園額曰非園當是時山祇一部巽耳而今乃有樹有石有陂池有堂榭雖不足以窮勝覽而與前則大異矣天地間盈虛消息之變而事勢之無常固如是哉夫昔非園而今為園則曷為仍以非名之余謂昔日之非人所知也今日之非人所未必知也而不聞之乎莊周夢為蝴蝶相相然俄而覺遂逸然不知周之夢為蝶歟抑蝶之夢為周歟而必執蝶曰蝶執周曰周不可謂違也余之踐斯夢而名之此物此志也是故樹不必古蔥蔥爾石不必奇余索爾陂池不必漫衍澹澹爾臺榭不必瑰麗亭亭爾有花則時之時有蔬則種之園寓意於物而不留意於物以是為非園也固宜然余即不若是而樹必古石必奇

設池必漫行。臺榭必瑰麗。窮耳目之勝。殫土木之功。又可執以為國乎。夫昔之夢誠夢也。而亦知有覺而夢者乎。匪昔之幻而今之真。慎毋泥昔之非而今之是也。夫嗚呼。天下之一時稱盛而遷徙不常者。豈少哉。夫園其小焉者也。余因以自鑒。而並詔我後人焉。是為記。

遊黃山記

黃山距余家百三十里。而迄乾隆丁酉秋。遊具已備。而塵事糾紛。一羈十載。丁未春。請養歸里。程丈後村。知余有夙願。且途所已經。願為先導。定約於戊申七月。偕往。乃及期。而後村病不果行。復訂於今年七月。而旱暵殊甚。稻幾弗登。隨作毀約詩。致倦遊意。次日雨忽大沛。半月間得甘澍者數四。蘇枯振槁。猶獲過半。炎熇之氣亦頓釋。似山靈尚非我拒者。復以詩理前約。遂於七月二十四日戊申。隨伯兄發里門。天光澄露。清風徐來。行四十里。至佛子嶺僧舍。後村已攜其族姪孫伯厚先至。晤時始知後村病。先是恐余知而中止。故諱言之。余乃力勸回車。且伯厚亦曾遊黃山者。先路之導。不必後村。而主誼諄篤。堅持不可。遂止宿焉。階下有木蓮一株。徑尺許。僧岸門云。此自黃山慈光寺移來者。其歲月已不可計。黃山中今僅慈光一株。此其二焉。餘無有也。往年皆四月生花。而樹杪忽放一枝。得未曾有。花分九瓣。與芙蓉相似。而較

小色白如玉。清香襲人。不知慈光一株亦能若是破格。生花否耶。次日己酉。月甫上而行。籃輿中略見峯影。盈耳皆潺潺聲。過容溪始放曉。不及訪容成臺。十餘里。踰山口嶺。嶺之北見雲門一峯。若天開闢闔然。再行過石碣嶺。黃土嶺。又二十里許。至芳村。雲門之西巍然插霄漢者。天都峯也。又十餘里。抵湯口。其居民善登陟。趨捷如猿。蹂遊黃山者。不啻以其人為輿為杖。乃招之而行。不數轉。聞湧地嶢岬。喜且兼。僕路之犖确。亦倍於前。下有溪。亂石縱橫。激流噴雪中。一泓溶溶泛碧。為百丈潭。過此約里許。至祥符寺。寺隔溪。即湯池。舊名湯院。為黃山中精藍之最古者。溪流湍駛。易於泛溢。寺屢遭其厄。僅存數椽。司湯池者。則茅蓬之僧矣。時夕陽已在林杪。同人急渡板橋。北視湯泉。泉之上為紫石峯。峯之右為茅蓬。茅蓬創始於僧悟千。三傳而付鉢於今之戒嚴。皆能持戒律者。昔僅草屋半間。今已崇闋其殿。莊嚴其佛。居然稱名利也。寺額曰紫雲庵。其前松竹夾磴。遙蒼翠蔽日。隔溪即雲門左支之山。勢頗峻。水簾洞。桃花源。青蓮宇。諸勝在焉。晚與戒嚴聽溪聲。談遊政。娓娓不倦。夜分乃就寢。二十日庚戌。早起。天微作陰。飯罷。下石磴。浴於湯泉。泉脈自沙中出。泛而上。若徑寸之珠。累累不絕。解衣浴之。見水面氣蒸蒸。始微溫。少頃則漸熱。沙之質細而膩。可以拭身。盤礴既久。汗幾如雨。浴已覺暖氣沁骨髓。逾數刻。弗能嗅。雙掌則微香透鼻。觀

如蘭花將放時。真丹砂靈氣所氤氳而出也。午後復度板橋。尋桃花源故址。僅存彷彿間。青蓮宇則已莫得其處。水簾洞在上方兩峯之間。荆棘填塞。無徑可搯。快快弗釋然。回視紫雲庵後諸峯。天都居其中。稍下為老人峯。朱砂峯。左則青鸞鉢。孟紫石。右則蓮蕊桃花芙蓉。拔地倚天。層青疊翠。芙蓉白雲。猶復縈繚變滅於其間。如旖旎如羽葆。雖尚未窺閭奧。而已相與鼓掌咋舌。詭為奇觀矣。是夜後村病甚。二十七日辛亥。勸之先歸。至再至三。乃以主誼屬伯厚。始別去。辰刻招戒嚴弟子深雪偕行。拾危磴。入叢木中。綠陰沈沈。肌骨皆冷。三里許。過得心亭。即慈光寺。昨所望紫雲庵後諸峯。環繞如屏障。中間廣場數十畝。仰羅峯秀。俯蹴雲光。福地天成。甲於吾郡。惜火劫頻仍。殿宇皆非舊觀。明神宗所錫金佛藏經。亦歸灰燼。今所存者。惟毘盧塔。金碧猶耀目。此外僅普門像一軸。金繡袈裟一領而已。問木蓮花。已枯其半。雖較雲嶺者倍一圍。而色澤弗及。花時亦不繁。地之盛衰。此其徵也。由寺右行。取徑在天都朱砂二峯之間。鳥道一痕。磳硤峭削。行數里。過飛來洞。又過觀音巖。僕夫無不作吳牛喘望朱砂峯。猶在天外。再上過龍翻石。延緣至老人峯側。則朱砂峯始在芒屨下。攀躋之難。至危且苦。而左右峯色。石之白者如脂。碧者如瑤。復間以屈曲之松。蒙茸之草。斷續之雲。目不暇接。故苦而甘。危而安也。老人峯者。其上有石。如老人踉蹌狀。坐其

下。望天都仍在天外。陡壁之半。有洞曰白猿洞。云有白猿居其中。莫知歲月。人亦不易得而見之。再上為天門。北乃陡壁。南一巨石橫立如戶限。起絕萬峯之表。而以視天都。則甫及其半也。過此石益奇。松益古。雲巢洞之南。有一字松。豈伏羲畫卦所遺。洞高二丈。深幾倍之。苔紋斑駁。傳色如繡。洞之北。磴道右折。復轉而左。見迎送松。一延客入。一讓客出。似為遊人作東道主。而迎者葉就黃落。雲液盡。尚望其潤。而復蘇。山靈庶幾呵護乎。再上為別有天。始得耕雲峯。自下望之。與天都合。故不見突兀之勢。亦凌太虛。而終避天都數仞。又上為蒲團石。平廣容八九人。汲泉煮茗。環坐說安心偈。頗堪憩倦足。茶罷。策杖而登。為臥龍洞。見臥龍松。橫臥石壁。約三丈許。壁既盡。松之首欲昂。然枝重則恐下垂。一石自絕壑突起而支之。松乃得盤青挽翠。結蓋而覆其石之頂。亦奇觀也。折而左。為小心坡。復折而右。為斷凡橋。度橋而上。兩石壁如斧削。仰望天光如窺窗隙。為一綫天。出壁得稍平處。坐而回望。則壁巔之石。各不相符。各銳其頂。或如劍之衝斗。或如戟之刺天。或如怪雲之米墜而凝。或如老樹之皮僵而立。松蟠其翠。鱗結其青。陸離奪目。問名曰蓬萊島。想三壺之秀。不過如斯。惜是時無雲。以作之海也。再上為文殊洞。洞腹如折。中亘巨石。不得上。山僧作木梯丈許。倚石側。人轉身緣梯。從石罅出。其上為小清涼。過小清涼。則文殊院矣。院倚玉屏。

峯左右兩石。俗以左為獅。右為象。然殊不相似。左右之外。天都卓爾。右石之外。蓮華
嫣然。其附於兩峯之外者。各層遞而下。如玉階千官。翼翼然就班拱侍。無少素者。院
之南為丈殊臺。立臺上俯視。則山山低伏。如几案。如兒孫。真上界清虛之府也。天既
暮。碧宇瑩澈。衆星皆下。垂北斗。疑去顛頂尺咫。其光可鑑。恍惚置身天上。而罡風颼
至。衣重裘。猶有寒色。凡骨支離。能無愧耶。二十八日壬子。仍止丈殊院。不欲捨去。朝
旭已上十餘丈。霧忽作。始由遠山之幻。蓬蓬然起。繼則近山之幻。亦復如是。少頃。則
起於雲門。朱砂老人諸峯之麓。又起於天都蓮華之麓。及丈殊臺之前。復左右矣。轉
瞬間。萬山齊隱。惟最高之峯。四五浮霧上。俄而此露其頂。被沒其腰。俄而彼畢以紗
此施以障。僧溱雪云。當可得雲海觀。乃風作霧騰。不能成海。然溶溶漾漾。與臺埒平。
幾若一蹴可登者。不將起天際。真人之想乎。及午。霧乃散。由院之右。登立雪臺。觀後
海諸峯。逞異爭奇。又生幻相。坐良久。仍至丈殊臺。視立雪臺南面峯石。高高下下。如
盼如顧。其間古松。橫生側出。如經營位置。各得其宜。天然入畫之妙。恐荆關亦無能
著一筆。余向伯厚曰。人生但得此一壁。坐臥其下。可以終老也。二十九日癸丑。由丈
殊院右循磴下。至轉身巖。境益險。偏不容肩。仄不容足。爰棄籃輿。憑大力者負以行。
二里許。值閻王壁。壁寬幾及二丈。彭亨具腹。兩旁皆無所倚。下視則冥冥然莫測其

深壁上鑿磴為三折。僅能置趾。倘一失足。輒墜無底之壑。乃負者視若平地。超距而下。技獨絕也。由壁往西北行。循蓮華峯之麓。為蓮華溝。溝盡即蓮華嶺。嶺介蓮華逆。蓮二峯之間。高三里。陡絕難緣。倍於慈光之躋天門。負者五憩乃上。復數折。伯厚指糾磴謂余曰。由此可登蓮華峯。特險絕耳。余曰。黃山之峯。惟蓮華與天都並。天都無路可攀。故不作登陟想。茲得路而弗登。是虛擲此遊也。仍犯險令負而行。初覺陡峻。猶不甚偏。忽一轉而下。臨無地。寬不盈尺。沙雜於石。復滑甚。令人豎毛髮。幸丈許旋入洞中。洞盡而險如前。又入一洞。如是者。經四險。歷四洞。而已。及峯十分之九矣。洞各銳末。豐腹。其實或大或小。人似由藕節中行。緣本入瓣。何造物者之狡獪也。登其巔。中有石如蓮萼。四面各簇石片如蓮瓣。余坐萼之上。平揖天都。近挹蓮蕊。環視前後。海諸峯皆出其下。是時日正午。天風不作。岫雲盡收。僧瀑雪指西面。天盡處謂余曰。若為匡廬。若為九子。其白若一綫。縈繞而下。趨者則長江也。坐移時始下。過神龜。靈鶴二石。下百步雲梯。自梯上窺之。似磴盡路斷。無措足地。而梯之寬近三尺。深且平。古松數株。夾梯立。身可倚。手可攀。梯既盡。巖徑一曲。即可通。人以為不寒而慄者。余過之灑如也。自此復循蓮華峯西麓。壁摩於肩。石觸於脛。作蟻附行。逶迤至鼇魚洞。洞口古柏一株。乃千餘年物。摩挲久之。始入。拾三十餘級而出。其上為鼇魚脊。地

漸平可以昇輿。由轉身巖至此。路極險。余無濟勝具。賴負者濟以所窮。其人曰程冬生。父名社子。昔北平朱竹君前輩來遊時。社子負之呼之曰海馬。自是遊人入山無不招海馬者。今社子已沒。而冬生克紹其能。余遂呼之為海馬。駒云。由鼈魚菴行不
及一里。即天海。平廣足容萬人。舊有天海庵。遺址已失。西望鍊丹臺。穹窿特起。臺之
西。則翠微丹霞上昇。軒轅鍊丹諸峯。攢劍削圭。森列獻秀。復二里。攀葛援藤。上光明
頂。頂居黃山中央。高稍遜於天都蓮華。而勢若鼎足。匡廬九子亦依稀可辨。其左陡
壁萬尋。自東而西。寬及數里。俯視之。怪石林立。巖壑。不可以數計。深雪曰。此散花
塢也。下光明頂。緣山腰側行。其下為光明藏雲際。雲外清潭。巖嶂諸峯。各數百仞。而
瓏玲皴瘦。如盆盎中物。五里許。至師子林寺。倚師子峯麓。左為清涼臺門。所對者乃
光明頂側出之山。其山獨化石為土。杉陰蔚會。卓葉丹黃。羣峯之岬嶸。巖峯皆隱而
不見。處曠乃奧。處高似卑。亦別創一格也。日已西。復往西海門觀落照。過飛來峯。一
石橫伏於下。一石高十丈。厚約十之三。立於橫石上。不相連附。其西猶虛出橫石數
尺。似狂飈一撲。即可墜者。鬼斧神工。恐亦束手矣。西海門者。飛龍引鍼。數峯居其左。
丹霞上昇。翠微數峯在其右。對峙峴峭。若門然。坐門側。見右數峯之背。陡壁從地起。
莫計尋丈。壁之半。萬石離壁而立。圓而蓋者。方而闌者。曲而防者。直而挺者。或上費

下削或左凸右凹。故乃弁之側端為笏之擁。千狀萬態。丹青不能摹。猿獫不能陟。而松之碧。草之綠。映以返照之色。翠且兼紫。目晃神眩。惟令人狂叫歎絕而已。及暮始旋宿於師子林。甫一更而星斗忽沈。瓦溝浙浙作雨聲。竟夜未止。始知山高易靈。雲生易雨。視塵界陰晴迥異也。八月初一日甲寅。天晚雨止。而霧氣瀰漫。一峯不見。登臨之勝索然。然寺前品字松。連理松。蔥鬱輪囷。左旋右紐。俯仰其間。盤桓已足。乃天意似憐遊者過寂。薄午霧忽散。俾登清涼臺。略窺石筍。矧諸勝。雖不逾時。滄濛復合。而已屬意外之得矣。初二日乙卯。晨興。天有欲霽意。飯罷。登清涼臺。下視石筍。萬峯叢立。程冬生擇其形似者。一一為余指名。盡態極妍。神詭意謫。舌撝幾不能下。復過師子峯石。觀破石松。松踞峯頂。自石腹中出。徑盈尺。幹右生而枝左向。幹高僅二尺許。其枝已盤旋盈石頂。不知石堅於松。抑松銳於石也。志載破石松。在一綫天。崇禎戊寅。已遭雷火。初未聞有此株。而山靈著意補之。為名嶽生色。安知擾龍蒲團。棋枰數松。昔有而今無者。不且復生乎。下師子峯。復上黃花嶺。嶺半見始信峯。中裂千丈。上通以危橋。橋之西有松凝立。東伸一枝。若將引人臂而度者。即接引松也。伯兄停輿嶺頭。急招余曰。速來。至則遠近諸峯。出沒於白雲離即之中。在坳者如堆絮。在巔者如覆雪。圓如鏡者為湖。長如帶者為江。其日色所照作金色。而若濤若瀉者如

黃河雖未能作海，巍然具體而微，已足償我夙願。久之雲忽升，似將雨，不及登。始信峯為茲遊一恨事。過始信峯，為平天砭，砭之麓則步步下行。右即散花塢之北面，一峯橫數石，一石攢數松，無凡狀，亦無合相。左則石門峯，石柱峯，巍哉卓傑，端立不羣。其時靈氣忽濃，忽淡，乍合乍分，音樂鳥適，調喉轉舌於迷離縹緲間，為笙簧，為蕭管，停輿聽之，如鈞天廣樂，聞所未聞。再下則經石人指路峯，峯不甚高，其上有石人，寬衣博帶，面向入山磴道，作以手代語狀。余謂伯厚曰：天下惟鐵石心腸者始能多情。此宋廣平所以有梅花賦也。行數里，道旁有雪莊，悟和尚塔，雪莊通禪悟，精詩畫，結茅近散花塢，曰皮蓬。一時名賢高士樂從之遊。今皮蓬荒地，遊人不復過問，非有心者。安知此塔生滅何常於斯可悟。塔之右為白沙砭，砭盡為白沙嶺，自師子林至此路之險仄，亦同前海，而行者不病，以猶得一面依山耳。嶺之麓緣溪取徑，漸覺平，行五里至雲谷寺，環寺之山不復有石。九龍峯峙其前，尤娟秀可挹，松竹森森，澗流瀾瀾，亦選佛勝場。寺之宏敞，次慈光，而整肅過之。由寺而南，過步雲亭，里許，經仙人棧，再里許，經開門石，又二里許，則九龍峯在隔溪上，溪繞峯委折而下，值陡壁即成瀑布，壁分四層，瀑亦四折，層各有潭，潭各有多寡，合而計之，則九潭焉。瀑之色白，潭之色碧，錯出浮光，潏潏照巖谷，藍輿由隔山行，注視傾聽，頗盡其妙。夫黃山之勝，無

奇不備。惟水之勢微，不可無此瀑以補其缺也。過潭五里，至覺庵。乃雲谷下院。秋到方興，盈地新穀，不可以居。仍由湯口歸紫雲庵。戒公迎余曰：黃山在公囊中乎？余曰：黃山以雲以松以石勝。人盡得而知之。一片之雲有異勢，一尺之松無凡枝。人亦得而言之。至於石之何以勝，人尚未得而罄言之也。萬仞之峯，不若寸膚奇矣。而萬仞之峯，以億萬之石橫撐豎插，隨其大小，任其欹斜，層累而成，參錯而合，罅不妨漏，縫不必彌，以生松，以茁草，草以花，松以黛，使峯若繪若繡，非奇中之奇者乎？石之肖形者，若大士，若達摩，若阿羅漢，若老子，若飛仙，若神女，若宰官，若武士，若媪，若幃，若餅，若椽，若樺，若燭，若師，若龜，若鶴，若猿，若松鼠，若蟾蜍。一一指而言之，神似矣。然易一面即易一形。參一峯又現一相。其林林疊疊，有一石皆可以名一物，而執一物不足，以盡一石。且雲之根以石，石幻而雲亦幻。松之骨以石，石勁而松亦勁。黃山中凡雲與松之奇，皆石之奇。有以胚胎之鼓動之也，難名也。戒公撫掌曰：聆公言，可為石慶得知已矣。是夕聞後村病漸瘳，喜甚。然後村若非曾遊黃山者，自崖而返，必以為恨。而余積願於十三年之前，始無後村約，既不果，繼得後村約，復不果。此遊也。非天之沛然雨，非後村之諱言病，又幾裹足不前。余感玉成者天，汲引者後村也。初三日丙辰，辭戒公，澡雪出山，迂道行七十里，宿茗嶺僧舍。初四日丁巳，復行七十里，遇西干。

回望天都蓮華雲門數峯依依如故人然不敢久視恐山靈笑余又落塵界也與伯厚別乃徑歸